

## PAOT TE HŌM YŌG KUXA MĀM KA'OK XOP PU KAX'ĀMI'

<sup>1</sup> Ūgmūn yā Paot, Yeyox Kunnix tu hāpxopmāhā', ha Topa tek yāykutnāhā', tuk xānāhā', nūy mōgkutnā', 'āte hām'apak max'ax 'āktux, hu xa kax'āmi nūhū tappet.

<sup>2</sup> Hōmā, hāmyāxatamuk xohix 'lhā Topa te mōnāyxop hittap pu hām'āktux xex, ha Topa yōg pupi hām'āktux xop hittap te' xuktux, tu tappet tu kax'āmi', hu: “Topa te tik xop mō' pok putup, pu xa hām'apak max'ax 'āktux,” kaxīy.

<sup>3</sup> Yīy Topa tappet te Topak-tok 'āktux, tu yūmūg xuxyā Yeyox Kunnix 'āktux, hak mū yōg tikmū'ūn kutok pit, yā mōnāyxop hittap Namix mōkputox Yeyox.

<sup>4</sup> Tu' max xe'ēgnāg, Topa putuk tu', yā Topak-tok xe'e', tu' xok xe'e, yīy Topa te hāpxopmā ka'ok xe'ēgnāg, tu' hīnnāhā putpu', pu' xohix yūmmūg, yā Yeyox mūn Topa hāk-tok.

<sup>5</sup> Yā Topa tek yāykutnāhā', nūy nūgkutnā', tu 'ā yāy 'āxet'ax hōm 'ū puknōg xop xohix kuxa mām māmah kamah, pu tu' yīpkox pi hām'apak max'ax pu',

<sup>6</sup> ha 'āxop kuxa mām ka'ok kamah, kōmēn Hōm tu 'āpip, ha Topa te 'āxānāhā', xa Yeyox Kunnix hā 'āxape'.

<sup>7</sup> Kaxīy 'āte kax'āmi tappet, tu kōmēn Hōm yōg kuxa mām ka'ok xop pu ka'āmi', yā Topa te mō 'āxop yāy xe'ēgnāg, tu 'āxop xānāhā', xayīy yāyhā' yōg tikmū'ūn.

Pūyā Topa yūmūg Tak xik-tok Yeyox Kunnix xa hāmmāxnā', xix 'ākuxa māmā'.  
 hāmmāxnā', xix 'ākuxa māmā'.

*Paot te Topa pu hām'āktux, tu' max 'āktux*

<sup>8</sup> 'Āte Topa pu hām'āktux pax hāmāxap, hu: 'Āmax, Topah! kaxīy. Tu Yeyox Kunnix hā' xuktux, tu xa hāk hittup kamah. Yā hām xexka xohix yōg tikmū'ūn xa hām'āktux max, 'ākuxa mām ka'ok hah.

<sup>9</sup> Topa tu 'āte hāpxopmāhā, nūy mīy māynāg, tu hām'āpak max'ax 'āktux, tu Topak-tok 'āktux, ha' yūmmūg Topa te', tu 'āte hāpxe'e 'āktux yūmmūg. 'Ap 'āte koit'ah, yā 'āxaxok 'ohnāg.

<sup>10</sup> Tu Topa tu' xak pax, puyīy ka'ogā', tu' xak kamah, pu tu mōgkutnā 'āhah, yā Topa te mō yūmūg yāy xe'ēgnāg.

<sup>11</sup> 'Āhak mōg putup pax. 'Āte' xak, 'ūyīy 'āhak mōg, nūy xa hāmmax nā', nūy 'āka'ogā'

<sup>12</sup> pu yūmūg xohix mō' yāy nīynām: 'Āxop te mōgnīynām, xik mūn te mō'ānīynām, hu Topa yōg putat hā yūmūg mōg kumak mōg.

<sup>13</sup> 'Ūkxape xop, 'āte xa hām'āktux xe'e': 'Ūgmōg putup 'āhah, yā 'āmñīy xohix hāk mōg putup, pak mōg 'ohnāg. 'Āhak mōg, 'okpa 'āte' xak, nūy kama 'āmōgā'. Hōmā 'āte' puknōg xop mōgāhā', nōm xop te Yoneo yōg tikmūn'ūn hā' puknōg, Topa yōg putat hā' mōgāhā', yā kaxīy 'āte' xak, nūy 'āmōgā kamah.

<sup>14</sup> Topa te mōgkutnāhā, 'āte hām'āpak max'ax 'āktux, huk yīy hok'ah. Yā hām'āktux putup Yoneo yōg tikmū'ūn pu', xix puknōg xop xohix pu'. 'Āte ta nemēn, nūy hām'āpak max'ax 'āktux 'ūxohix pu'. 'Ap tayūmak ta nemēn'ah. Yā' nōy, yīy hāmyūmmūg xop pu 'āte hām'āktux, xix hāmyūmmūg 'ohnāg xop pu

'āte hām'āktux kamah, tu hām'āpak max'ax 'āktux putup 'ūxohix pu',

<sup>15</sup> xix 'āxop pu' xuktux'ax kamah, ha kōmēn xexka Hōm tu 'āpip, yīk mōg putup 'ōgnū kōmēn Hōm tu', nūy xa hām'āktux hām'āpak max.

*Hām'āpak max'ax mūn ka'ok*

<sup>16</sup> Topa tek xat 'āte hām'āpak max 'āktux, pu tikmū'ūn kuxa mām ka'ok Yeyox Kunnix kopah, pu tu' kuxa kummuk xit, nūy kuxa max tat 'ūyānān tu'. Yā hām'āpak'ax ka'ok, ha 'āte yāyhāhup 'ohnāg, nūy hām'āpak max'ax 'āktux. Ha Yoneo xop te hām'āpak hāmāxap, yā hām'āpak'ax ka'ok, tu Yoneo yōg tikmū'ūn kuxa kummuk xit, xix yā' puknōg xop kuxa xit kamah, nūy kuxa max tat 'ūyānān tu', yā' nōy putuk.

<sup>17</sup> Topa tep-tup, pu tikmū'ūn kuxa mām ka'ok Yeyox Kunnix kopah. Puxi', ha nōm tikmū'ūn mō'yāy xe'ēgnāg. Yā hām'āpak max xe'e! Hōmā tik te Topa pupi hām'āktux, tu tappet tu kax'āmi', nūy tikmū'ūn pu' xuktux, hu: “Tikmū'ūn kuxa yūm ka'ok Topa kopah, puxix Topa' kuxa kummuk tupmā', pu tu max, puyīy tikmū'ūn hi xe'ēgnāg,” kaxīy.

*Yā' hep xop xohix te hāpxopmā kummuk*

<sup>18</sup> Topa gāy tikmū'ūn kuxa kummuk hah, yūmū'āte' yūmmūg, yā Topa tep-tup hok, pu tikmū'ūn hāpxopmā kummuk hok. Yā tikmū'ūn te hāpxopmā kummuk pax, tu Topa hā' puknōg, puxi' nōy Topa yūmmūg hok kamah.

<sup>19</sup> Ha Topa gāy, tu' yānān tu' kummugāhā, tu' xūygāhā', tu nōm tikmū'ūn pu hāmyūmmūgā tap,

'ūkuxa kopa' yūmmūgāhā', puyīy tikmū'ūn Topa yūmmūg max,

20 'Ihā' pēnā hok, ha hāmnōgnōy mīy, xix hahām, ha tikmū'ūn xop xohix te hāmnōgnōy pēnāhā', xix hahām, tu Topa te' mīy yūmmūg, hu Topa xexka xe'ēgnāg yūmmūg, xix Topa ka'ok xe'ēgnāg yūmmūg, xix Topa xok hok yūmmūg. Tep te xīy tikmū'un te Topa yūmmūg hok? Yā Topa hi xe'ēgnāg.

21 Yā hāmyūmmūg, pāyā tikmū'ūn te Topa xaxok, tu nōm pu hām'āktux 'ohnāg, hu: “Āxexka Topah, xix 'āmax, xatek mū'ā hāpxop xohix popmāhā,” kaxīy. 'Āmhok, 'ap xuktux'ah, pap-tox kummuk, tu hāmpē'paxex 'ohnāg, tu mōktu hāmyūmmūg 'ohnāg, 'ūkummuk tu'.

22 Tu yāy hāmyūmmūg pe'paxex, 'ūhitop tu hāmpē'paxex, 'ūpa te hāmyūmmūg 'ohnāg tu', tup-tox kummuk.

23 Yā Topa hi xe'ēgnāg, pa tikmū'ūn te nīm, nūy topa komut xop pu nūktetex 'ūyānān tu', ha' komut xop te tikmū'ūn putuk, xix putuxnāg putuk, xix xokxop putuk, xi' kep hā' mōg xop putuk.

24 Yīy Topa te tikmū'ūn putox kummuk xop nīm, pu yāy putup'ax mīy, hu hāpxopmā kummuk, tu yāy kummugāhā',

25 tu Topa nīm, tu hāpxop pu nūktetex 'ūyānān tu', nōm hāpxop Topa te' mīy, ha Topa xe'ēgnāg nīm, tu' xaxok, nūy 'ūkoit'āx putup 'ūyānān tu', pa Topa mūn max, tu' hi xe'ēgnāg, ha' nōg 'ohnāg. Hamūn!

26 Yīy Topa te' nīm, ha hāpxopmā kummuk, tu' nōy pu' hupmāhā', ha 'ūn xop te 'ūn nōy pēnāhā', nūy nū mūtik tu yāyhā' xupxet,

27 ha tik xop te tik nõy pēnāhā', nõ mõ'āmā, nõy nõ mūtik tu nõm kummuk, tu 'ün putup nõg, pu nõ mūtik tu nõm, pa tik xop putup, yā' kummuk, hu yāy pu hāpkummugāhā', yīy Topa te' kummugāhā', ha' pago.

28 Tikmũ'ün kummuk te Topa xaxok, tu hāmyümmũg putup 'ohnāg, yīy Topa te' nīm, pu hāmpē'panõm kummuk, nõy hāpxopmā kummuk.

29 Yā' kummuk xe'ēgnāg, 'ūxonnix, tu' xupkumīy nām, tu' nõy pe'paxex kummuk, tu' nõy pu hāpkummugāhā', tu' yīpkumīy, tu yāykix, tu' nõy putex, tu yāy tuk-mīy, tu' koit, tu' xupmāhīy kummuk pax,

30 tu' nõy 'āktux kummuk, tu Topap-tup nõg, tu yāy mün pe'paxex xexka', 'ihā' nõy pe'paxex kutõgnāg, tu hāpkummuk mī'ax xak, tu yāy tak xi' tut pu' yīpkox 'ohnāg,

31 tu hāpkummuk mīy pax, tu hām'āktux xex, pāyā' xaxok, hu' hitop tu' xex, yā' mīy 'ohnāg, tu' nõy kuxa ka 'ohnāg.

32 Tu Topa yõg xat'ax yümmũg, ha' xat hok pu' mīy hok, ka Topa te: “Pūyā tu' xok 'üyānān tu',” kaxīy, pa' yīpkox 'ohnāg, tu hāpkummuk mīy pax, tu' nõy xop pu hāpkummuk yümmũgāhā', yā' nõy xapit, puyīy hāpxopmā kummuk kamah.

## 2

### *Topa te hāpkummuk mīy ha' pago*

1 'Ok 'āxop te 'ānõy yõg hāpxopmā'ax kopit? Yā' kummuk 'āktux, pa 'āxop te hāpkummuk mīy 'ānõy putuk, hu yāy yõg hāpxopmā'ax kopit'ax kamah. Yā

'ätix kummuk. Tep te xīy 'āxop kama hāpkummuk mīy?

<sup>2</sup> Topa mūn max, ha yūmū'āte' yūmmūg, ha' kopit max, tu' xat hok puyī' xohix hāpkummuk mīy hok, ha' kummugāp-tup 'ūyānān tu'.

<sup>3</sup> Pa 'āxop te hāpxopmā kummuk, 'ihā 'ānōy tu: “Ūmīy hok' Yā Topa tep-tup nōg hāpxopmā'ax kummuk, hu 'āxūygāp-tup,” kaxīy. 'Ok xate hāmpē'āpaxex, hu: “Topa tekmūn pēnā'ah?” Kaxīy. Yā' koit! Yā' pēnāhā'! 'Ūxohix te Topa pu yāy putuk, yīy Topa te yā 'ōg hāpxopmā'ax kopit putup kamah, tu 'ōg hāpkummuk mīy'ax hā 'āxūygāp-tup.

<sup>4</sup> Topa pe'āpaxek-tōgnāg hok! Yā' max xe'ēgnāg Topa, tu' hip, xayī pēnā', nūy yāyhāhup, nūy hāpkummuk mīy'ax nīm. Yā 'āxop te hāmyūmmūg.

<sup>5</sup> 'Āyīpkox hok, puxix Topa 'āxūygā, 'āxūy kutōgnāg nā' mōg, tu mōktu 'āxūy xexka, 'ihā Topa te' hep xop xohix yōg hāpxopmā'ax kopit, pu' xohix hāmyūmmūg: Yā Topa te hāmyok mīy,

<sup>6</sup> tu' xohix yōg hāpxopmā'ax yūmmūg, tu pagop-tup 'ūyānān tu', yā tikmū'ūn te hāpxopmā kummuk, puxix Topa' kummugā', ha tikmū'ūn te hāpxopmā max, puxix Topa hāmmaxnā'.

<sup>7</sup> Tikmū'ūn yāg te' xak, nūy hāpxopmā max, xi' xak, nūy tu max xe'ēgnāg, Topa putuk, xi' xak, pu Topa te: “Āxop yā yōgnū'!” kaxīy. Tu hāmmax hip, yīy nōm xop hīnnāp-tup xe'ēgnāg nūy Topa mūtik tu tīhi'.

<sup>8</sup> Pa tikmū'ūn nōy te yāy pe'paxex puxet, nūy yāy putup'ax mīy, xix hāpxe'ep-tup nōg, nūy hāpxopmā kummuk pax, ha Topa gāyāhā', ha hāpkummugāp-tup 'ūyānān tu', nūy pago.

9 Tikmũ'ũn xohix te hāpxopmā kummuk, puxix Topa' yānān tu' xūygā', yōgnũ Yoneo yōg tikmũ'ũn hāmāxap, hak-nāy tu' puknōg xop xūygā'.

10 Tu tikmũ'ũn max pu hāmmaxnāp-tup 'ūyānān tu', pu tu yāyhā max xe'ēgnāg, Topa putuk, ha' xekānāp-tup, xi' kuxa māp-tup. Yā hāmmaxnāp-tup 'ūyānān tu', tu Yoneo yōg tikmũ'ũn pu hāmmax nāp-tup hāmāxap, xik-nāy tu' puknōg xop pu hāmmaxnāp-tup.

11 Yā Topa pu 'ūhep xohix te yāy putuk, tu hāpxopmā'ax xohix kopit nūy yūmmūg, 'ok pe hāpxopmā max, pe tu kummuk, nūy tu pago.

12 Hām puknōg xop te Mōyyex yōg xat'ax yūmmūg hok, tu hāpxopmā kummuk, ha Topa te' yōg hāpxopmā'ax kopit, tu tikmũ'ũn yāy xat'ax hā' kopit, 'ihā' xat'ax yūmmūg 'ohnāg, ha: “Ūkummuk!” kaxīy. Ha Yoneo yōg tikmũ'ũn te Mōyyex yōg xat'ax yūmmūg, tu hāpxopmā kummuk, puxix Topa' yōg hāpxopmā'ax kopit, tu yāy yōg xat'ax hā' kopit, hu: “Ūkummuk!” kaxīy.

13 Tikmũ'ũn te hāpxopmā max, puxix Topa tep-tup pax, 'ok pe' xat'ax yūmmūg, 'ok pe' xat'ax yūmmūg hok, ha tikmũ'ũn te hāpxopmā kummuk, puxix Topa tep-tup nōg, 'ok pe' xat'ax yūmmūg, 'ok pe' xat'ax yūmmūg hok.

14 Hām puknōg xop te Mōyyex yōg xat'ax yūmmūg'ah, pa' puknōg te hāpxopmā max, puxix tu' mīy, Topa yōg xat'ax mīy, 'ihā' yūmmūg hok.

15 'Ūyūmmūg. Topa te yāy yōg xat'ax yūmmūgāhā', nōm xop kuxa kopa' yūmmūgāhā', yī' kuxa kopa' yūmmūg, 'ok pe hāpxopmā max, 'ok pe' kummuk.

16 Hāptup puxet mō'nā'ax, ĩhā Topa te Yeyox xat, pu tikmũ'ũn xop xohix yōg hāpxopmā'ax kopit, nũy hāmpē tu panōm yūmmũg, nũy hāmpē tu pānōm xaptop'ax xohix yūmmũg, ha 'āte hām'āpak, max'ax hā hām'āktux, yā Topa te hāmpē'pānōm xohix kopit putup, tu hām'āpak max'ax hā' kopit putup.

*Yoneo xop xix Mōyyex yōg xat'ax*

17 Ha 'āxop te: “Ūgmũ'ũg Yoneo xop yōg,” kaxĩy. 'Ākuxa mām ka'ok Mōyyex yōg xat'ax kopah, mōnāyxop hittap Mōyyex te kax'āmi', ha 'ākuxa mām ka'ok nō'ōm kopah, tu: “Ūgmũ'ũg yā Yoneo xop yōg, ha Yoneo yōg tikmũ'ũn yā Topa hā tikmũ'ũn xe'e',” kaxĩy. Yā' hitop tu yāy mūn xexka pe' āpaxex.

18 Tu Topa yōg putup'ax yūmmũg, xayĩ' mĩy māynāg. Tu hāmmāx'ax yūmmũg, xayĩy hāpxopmā max. Pāyā hitop tu hāmyūmmũg,

19 hu yāy pe'āpaxex hitop, hu: “Āte hāmyūmmũg, hu hāmyūmmũg hok xop pu hāmyūmmũgā'ax,” kaxĩy.

20 'Ākuxa mām ka'ok 'ūxat'ax kopah, yā hāmmāx xohix yūmmũgāhā', xix hāpxe'e yūmmũgāhā', yĩy 'āxop te' tuktup xop pu hāmyūmmũgā'ax, xix hāmyūmmũg hok xop pu hāmyūmmũgā'ax.

21 Pāyā yāy pu hāmyūmmũgā'ax xate' xaxok, tu Topa yōg hām'āktux 'āktux, pāyā' mĩy 'ohnāg. 'Āxop te: “Āxupxet hok!” kaxĩy, tu 'ānōy pu' xat, pu tu' xupxet hok, ĩhā xate' xupxet.

22 Tu' xat hok, pu' nōy hā' xupxet hok, pa 'āxop te 'ānōy hā' xupxet kamah. Tu topa komut xop putup nōg, pāyā topa komut pet tu xate' xupxet, nũy puknōg xop gāyā'. Yā 'ākummuk!



23 'Äxop te yäymün xexka pe'äpaxex, Topa te xa' hõm yäy xat'ax hah, päyã 'a' mÿy'ah, 'äyïpkox 'ohnäg tu', yï' puknõg xop te Topa 'äktux kummuk, yã 'äxop te Topa pu' hupmähã', ha' yäyhähup.

24 Topa yõg tappet te: “Üpuknõg xop te Topa 'äktux kummuk, 'äxop Yoneo xop te häpxopmã kummuk hah,” kaxïy.

25 Yoneo yõg yümüg tikmũ'ün te kaxxop pit xop yäy nãg xax yïmap tu' mep, puyïy tikmũ'ün te hãmyümmüg. Yã Topa yõg tikmũ'ün xe'e'. Yoneo xop te' xat'ax pu' yïpkox pip, puxix tu max, pa' yïpkox hok, puxix yäy xax mep 'ühitop tu'.

26 'Üpuknõg xop te' xat'ax pu' yïpkox pi', puxix tu Topa hã tikmũ'ün xe'e', ïhã yäy xax yïmap mep 'ohnäg.

27 Ha kaxïy puknõg xop te yümüg yõg häpxopmã'ax kopit putup, nÿy häpxopmã'ax yümmüg, tu yäy xax yïmap tu' mep 'ohnäg, päyã Topa yõg xat'ax pu' yïpkox pip, nÿy häpxopmã max, pa yümũ'ãte Topa yõg xat'ax yümmüg max, tu' pit xop yäy xax mep, päyã' yïpkox hok, tu häpxopma kummuk, puxi' puknõg xop te yümũ yõg häpxopmã'ax kopit putup.

28 Yoneo yõg tikmũ'ün yã Topa yõg tikmũ'ün xe'e'. Piyã' Yoneo xop yõg? Tikmũ'ün te xïy yã Topa yõg xe'e'? Tikmũ'ün te' xax xak puxet, tu yäyhã 'ohnäg Topa yõg tikmũ'ün. 'Ämhok.

29 Pa tikmũ'ün kuxa te Topa xak, nõ'õm te Yoneo xop yõg xe'e', ha Topa Koxuk te' kuxa tupmähã, pu tu Topa hã tikmũ'ün, 'üxat'ax te' mÿy hok hah. Yã Topa tep-tup, tu' max 'äktux. 'Ap tikmũ'ün nõy te hãm'äktux'ah.

### 3

<sup>1</sup> Tikmũ'ũn 'ũm te' yĩkopit, hu: “Ok max 'ũgmũn yā Yoneo xop yōg?” kaxĩy. Xix: “Ok max Yoneo xop pit yāy nāg xax yĩmap nũy xak?” kaxĩy.

<sup>2</sup> Yā' max xe'e'. Topa tek mũ yōg Yoneo xop pu yāy yōg hām'āktux 'āktux, 'ũyĩy tu xeh max.

<sup>3</sup> Tikmũ'ũn 'ũm te hām'āktux, hu: “Pa Yoneo yōg tikmũ'ũn punethok yĩpkox pip 'ohnāg, tu Topa yōg hām'āktux pu' yĩpkox 'ohnāg,” kaxĩy. 'A' yũmmũg, pa Topa mũn max, tu Yoneo yōg tikmũ'ũn pu hām'āktux xex, tu' xaxok 'ohnāg.

<sup>4</sup> Hamũn! Topa te hāpxe'e 'āktux, tu hāmyok mĩy, tu' koit 'okpa tikmũ'ũn xohix te mō'āmā', yĩy Topa tappet te:

“Yā Topa te hāmyok mĩy, tu hāpxe'e 'āktux,  
tu' koit 'ohnāg,

pu' pa te hāmyũmmũg xe'e' yĩkopit, tu: 'Ūmax,'  
Kaxĩy.

<sup>5</sup> Yũmũ'āte hāpxopmā kummuk, kopxix tikmũ'ũn nōy pu Topa mũy, yā hāmyok mĩy Topa te', ha yũmũ yōg hāxopmā'ax kummuk hā yũmũ'āte hāmyũmmũgāhā'. Yā tikmũ'un punethok te hitop tu hām'āktux, hu: “Pũyā Topa 'ũgkummugā hok, nũy yũmũ yōg hāpkummuk mĩy hā' pago', 'Ap max'ah Topa 'ũgkummugā'! Kaxĩy.

<sup>6</sup> Nāy, Topap-xehnāg te hāmyok mĩy' Yā Topa mũn pa te hāmyũmmũg xe'ēgnāg, nũy tikmũ'ũn xop xohix yōg hāpxopmā'ax kopit, xi' hep xop xohix yōg hāpxopmā'ax kopit. Paxpu Topa hāpxopmā kummuk, puxix tu tikmũ'ũn xohix yōg hāpxopmā'ax kopit hok.

<sup>7</sup> 'Āte xe hām'āktux, hu: Yāk mũn te koit, pāyā Topap-xehnāg te koit 'ohnāg. Tikmũ'ũn xohix te yā

koit pax, hu hāmyūmmūg. Yā Topap-xehnāg mūn max xe'ēgnāg. Ha tikmū'ūn 'ūm te hitop tu yīkopit, hu: “Teptu Topa te' yānān tuk kummugāhā', 'āte koit hah?” Kaxīy.

<sup>8</sup> Tikmū'ūn nōy te hitop tu hām'āktux, hu: Yā' max yūmū'āte hāpkummuk mīy, puyīy Topa hāmmaxnā', yā' yānān tu hāmmaxnā'," kaxīy. Ha tikmū'ūn nōy tekūn kummuk 'āktux, hu: “Paot te nōm 'āktux.” Kaxīy. Tu' koit. Topa te hām'āktux kummuk xop hāpkummugāp-tup 'ūyānān tu'.

*'Ūxohix te hāpxopmā kummuk*

<sup>9</sup> 'Ok Topa tekūn yōg Yoneo xop pe'paxex max, xi' puknōg xop pe'paxex kummuk? 'Āmhok! Yā' xohix te yāy putuk Topa pu', 'ūxohix te hāpxopmā kummuk putup pax, ha' kuxa hīy ka'ok,

<sup>10</sup> yīy Topa yōg tappet te:  
“Tikmū'ūn yok 'ūm 'ap xip'ah.

<sup>11</sup> tu yā hāmyūmmūg 'ohnāg, xix Topa xak 'ohnāg.

<sup>12</sup> 'Ūxohix te Topa nīm, tu Topa yōg putat xak.

'Ū 'ūm te hāpxopmā max? 'Ap xip'ah, 'ap puxehnāg xip'ah.

<sup>13</sup> 'Ūyīy'ax te xukpot hax xūy, yā' kummuk, tu yā mō'āmā pax,

'Ūyīkox te kāyānox yīkox putuk, nūy tu yīy'ax hāp-tex.

<sup>14</sup> Tu' mǎnōg, hu: 'Pūyā Topa 'āxat hā 'āp-tex!' kaxīy.

<sup>15</sup> Yā' xak, nūy tikmū'ūn xūygā', nūy putex,

<sup>16</sup> tu hāpkut'ex kummuk pax nā' xip, tu hāpkoxyōy pax,

<sup>17</sup> tu' nōy kuxa yūmmā 'ohnāg,

<sup>18</sup> tu Topa yīpkutuk 'ohnāg, nūy tu nūktettex, yā' kuxa te' yēy 'okpa Topa xip.” Kaxīy.

19 Yūmū'āte hāmyūmmūg, tu Topa te' xat'ax hōm yūmmūg, ha Yoneo yōg tikmū'ūn pu' hōm, tu' hōm puyī' xohix yāy yōg hāpxopmā'ax yūmmūg, nūy yāyhāhup Topa tu', ha Topa te tikmū'ūn xohix, xi' hep xop xohix yōg hāpxopmā'ax kopit putup, nūy yōg hāpxopmā kummuk yūmmūg, nūy yānān tu' kummugā'.

20 Paxpu tikmū'ūn Topa xat'ax pu' yīpkox pi', puxi' kuxa tupmā hok. 'Āmhok. 'Ūxat'ax te tikmū'ūn pu hāmyūmmūgāhā', pāyā' kuxa kummuk tupmā 'ohnāg.

*Tikmū'ūn kuxa yūm ka'ok Yeyox kopah, puxix Topa' kuxa kummuk tupmā'*

21 Pa Topa te tikmū'ūn kuxa kummuk tupmā nōmhā', tu' xat'ax hok hā' tupmāhā', ha Mōyyex yōg xat'ax te yūmū'ā hāmyūmmūgāhā', xix tik hittap xop te Topa pupi hām'āktux, tu yūmū'ā hāmyūmmūgāhā kamah, yīy Topa yōg tappet te: Ya hamūn! Kaxīy.

22 Topa te' kuxa kummuk tupmāhā', pu tu kuxa max. 'Ūkuxa yūm ka'ok Yeyox Kunnix kopah, yīy Topa te' tupmāhā'. Yā' hep xohix te yāy putuk, yā Yoneo yōg tikmū'ūn, xix nōm xop te Yoneo xop hā' puknōg, yā yāy putuk. Ha Topa te' kuxa mām ka'ok xop xohix tupmāhā', pu tu kuxa max.

23 'Ūhep xop xohix te Topa yōg putat xak, tu' nīm, tu hāpxopmā kummuk pax, hu Topa putuk 'ohnāg.

24 Pa Topa te hāmmāxnāhā', tu nōm kuxa kummuk tupmāhā', 'ūhok hā' tupmāhā', yā Yeyox Kunnix xok hā' tupmāhā', pu tu kuxa max. Yeyox Kunnix xok, nūy tikmū'ūn kuxa kummuk xit, nūy kuxa max tat 'ūyānān tu'.

<sup>25</sup> Topa te tu' mūg Kunnix tu: “Ūpēnā,” kaxīy, tu nōm yāykutnāhā', pu mīpkupnix tu tu' xok, puyīy Topa tikmū'ūn yōg hāpkummugā'ax xaxogā', pu tu kux, Yeyox Kunnix xok'ax hā Topa te' xaxogāhā', tu hāmyok mīy xe'ēgnāg tu' xaxogāhā', tikmū'ūn kuxa mām ka'ok hā' xaxogāhā'. Hōmā Topa te nōā'tot tikmū'ūn yōg hāpxopmā'ax kummuk, tu 'ap koit'ah,

<sup>26</sup> pa hōnhā Kunnix mūg, ha' xok tikmū'ūn pupi', pu tikmū'ūn xohi' yūmmūg, nūy: “Yā Topa te hāmyok mīy, hamūn, Topa max xe'ēgnāg,” kaxīy. Ha hāmyūmmūgāhā', puyīy yūmmūg. Yā Topa te tikmū'ūn kuxa kummuk tupmāhā', tu' kuxa mām ka'ok xop tupmāhā', nōm xop kuxa mām ka'ok Yeyox kopah.

<sup>27</sup> Putep te xīy yā yāy pe'āpaxex? Putep te xīy 'āyōgkānām nām hā 'āxip? 'Ok yūmū'āte hāmyok mīy, pu Topa yūmūg putup? 'Ok yūmūg yīpkox pip Topa yōg xat'ax pu', nūy yūmūg kuxa tupmā'? 'Āmhok. 'Ap kaxīy'ah. Pāyā yūmūg kuxa mām ka'ok Yeyox kopah, hu Topa te yūmūg kuxa tupmāhā', pu tu kuxa max.

<sup>28</sup> Hu' yūmmūg, Topa te' kuxa yūm'ax puxehnāg hā tikmū'ūn kuxa tupmāhā', tu' xat'ax hā' tupmā 'ohnāg, tu' yīpkox pip'ax hā' tupmā 'ohnāg.

<sup>29</sup> 'Ok Topa te Yoneo xop puxet hā yā Topah? 'Ok pe Topa te' puknōg xop hā yā kamah? Hamūn! Yā' hep xohix xop hā Topah.

<sup>30</sup> Topap-xet, tu Yoneo yōg tikmū'ūn kuxa tupmāhā', 'ūkuxa mām ka'ok hā' tupmāhā', tu' puknōg xop kuxa mām xop kuxa tupmāhā'.

<sup>31</sup> 'Ok Topa te' xat'ax nōā', puyīy tikmū'ūn kuxa mām ka'ok Yeyox kopah? 'Āmhok. Topa te' nōā'

'ohnāg, hak mū'āte' xat, puyī' yīpkox pi', nūy māynāg mīy.

## 4

### *Paot te mōnāyxop 'Amanām 'āktux*

<sup>1</sup> Āpu yūmū'āte 'Amanām 'āktux, nōm te Yoneo yōg tikmū'ūn xohix hā mōnāyxop hāmāxap. Putep 'āktux'ax yūmū'āte'?

<sup>2</sup> Yā Topa te 'Amanām max 'āktux. Teptu Topa te' xuktux? 'Ok hāpxopmā'ax hā' xuktux? 'Āmhok. Yā' hok tu Topa te mō'yāy xe'ēgnāg, yīy 'Amanām te yāy mūn kutōgnāg pe'paxex.

<sup>3</sup> Yā Topa yōg tappet te: “Amanām kuxa yūm ka'ok Topa kopah, yīy Topa te' kuxa kummuk tupmāhā', pu tu kuxa max.” Kaxīy.

<sup>4</sup> Tikmū'ūn hām, hu tayūmak paha', 'ūhok hā' pa 'ohnāg, pāyā hām'ax tu' paha'.

<sup>5</sup> Ha tikmū'ūn kuxa kummuk, 'ap hāpxopmā max yūmmūg'ah, pa' kuxa yūm ka'ok Topa kopah, puxix Topa pēnā', nūy kuxa yūm'ax pēnā', tu' hok hā' kuxa kummuk tupmāhā'. 'Ok Topa te tikmū'ūn kuxa kummuk xohix tupmāhā'? 'Āmhok. Pa nōm xop te hāpxopmā max hok, tu' kuxa mām ka'ok, yā Topa te nōm kuxa tupmāhā'.

<sup>6</sup> Hōmā mōnāyxop hittap Namix te hām'āktux, tu tikmū'ūn hittup'ax 'āktux, Topa te' yōg hāpkummuk mīy'ax xaxogāhā', yā hāpxopmā'ax hok hā' tupmāhā', ha' hittup tikmū'ūn, yīy Namix te:

<sup>7</sup> “Tikmū'ūn kuxa hittup, Topa te 'ūyōg hāpkummuk mīy'ax

xaxogāhā hah, pu tu kux.

8 Tikmũ'ũn kuxa hittup, Topa te' yōg hāpkummuk  
mĩy'ax

mō'kupix 'ohnāg, ha' hittup," kaxīy.

9 Pi'yā' tikmũ'ũn hittup? 'Ok Yoneo yōg tikmũ'ũn  
puxet hittup? 'Ok pe' puknōg xop hittup kamah?  
Namix te putep 'āktux? Yā Namix te' hep xop xohix  
'āktux, nōm kuxa mām ka'ok xop 'āktux, yīy Topa  
yōg tappet te xe: "Amanām kuxa yūm ka'ok Topa  
kopah, yīy Topa te' kuxa tupmāhā', pu tu kuxa  
max," kaxīy.

10 Hām 'ūm hā Topa te' tupmāhā'? Pi'yā'? 'Ok pe  
'Amanām te yāy nāg xex xak 'ūyīmap tu hāmāxap,  
hak-nāy tu' tupmāhā'? 'Ok pe Topa te 'Amanām  
kuxa tupmā hāmāxap, hak-nāy tu yāy xax xak  
'ūyīmap tu'? Yā Topa te' tupmā hāmāxap,

11 hak-nāy tu 'Amanām te yāy xax yīmap tu' xak,  
puyīy tu yāy kuxa yūm'ax yūmmūgā', yā' kuxa yūm  
'ax ha Topa te 'Amanām putup, tu' kuxa tupmā  
hāmāxap, pu tu max, yīy 'Amanām te yūmũ' hā  
mōnāyxop, ha yūmūg kuxa mām ka'ok hā yūmūg  
kuxa tupmāhā yāy pu', pa yūmūg yāg te yāy xax  
'ūyīmap tu' mep hok.

12 Ha 'Amanām te Yoneo yōg tikmũ'ũn hā  
mōnāyxop yā kamah, nōm xop kuxa mām ka'ok  
Topa kopah, tu 'Amanām putuk, Topa yōg putat  
hā' mōg 'Amanām putuk tu', ha kaxīy 'Amanām  
kuxa yūm ka'ok hāmāxap, tuk-nāy tu yāy nāg xex  
yīmāp tu' xak.

### *Topa te hām'āktux xex*

13 Topa te 'Amanām pu hām'āktux xex, xix  
'Amanām mōkputox pu hām'āktux xex kamah, nūy  
tu hām xexka hōm'ax 'ōm pu', xi' mōkputox pu',

puyīy yāy yōg nū hām xexkah, ha hām'āktux xex, 'Amanām kuxa yūm ka'ok hah. Teptu hām'āktux xex 'Amanām pu'? 'Ok xex 'ūxat'ax mīy hah? 'Āmhok. Topa mūn te hām'āktux xex hāmāxap, 'Amanām kuxa yūm ka'ok hah, hak-nāy tu 'Amanām te' xat'ax pu' yīpkox xip.

14 Yoneo yōg tikmū'ūn yīpkox pip Mōyyex yōg xat'ax pu'. Paxpu Topa te hām'āktux xex 'ūyīpkox pip xop pu', puxik-tōgnāg, pu' kuxa mām ka'ok, puxix Topa hām'āktux hitop tu' xex.

15 'Ūxat'ax te Topa te hāmyok mīy 'āktux. Tikmū'ūn yīpkox 'ohnāg Topa yōg xat'ax pu', nūy tu hāpxopmā kummuk, puxix yāy tu Topa gāyāhā', ha Topa te' kummugāp-tup 'ūyānān tu'. Paxpu' xat'ax tu xip hok, puxix tikmū'ūn hāmyūmmūg 'ohnāg, nūy xat'ax pu' yīpkox pi', puxix Topa tu gāy hok kamah.

16 'Ūyūmmūg. 'Amanām kuxa yūm ka'ok Topa kopah, yīy Topa te hām'āktux xex xe'e', tu' hok hōm'ax 'Amanām mōkputox pu', nōm xop kuxa mām ka'ok xop pu' hok hōm, nōm te Topa yōg putat hā' mōg, 'Amanām putuk, ha yūmū'ā hā 'ātak, yā yūmūg kuxa kama mām ka'ok.

17 Ha Topa yōg tappet te: “Ūhēp xop xohix te 'Amanām 'āktux putup, hu: ‘Amanām yā yūmū'ā hā mōnāyxop, yā yūmūg kuxa mām ka'ok kamah, 'Amanām putuk,’ ” kaxīy. Yīy Topa te hām'āktux xex ka'ok, ha 'Amanām kuxa yūm ka'ok Topa kopah, yā Topa xexkah, tu tikmū'ūn xakix'ax hīnnāhā', tu hām xexka xohix yōg hāpxop mīy, tu hāpxop hok hā' mīy, 'ūxat'ax hā' mīy.

18 'Amanām kutut, xi' xetut kutut, 'ūka'ok, tuk-tok



'okpa Topa te ta tu hām'āktux xex, hu: “Āmōkputox xohix xexka pip punethok,” kaxīy. Yīy 'Amanām kuxa yūm ka'ok, tu hāmmax hip, pa' kutut xe'e 'Amanām,

<sup>19</sup> 'ūyōg hāmyāxatamuk xohix te 100, ha' yīn pu'uk, pa' kuxa yūm ka'ok, tu' yīkopit 'ohnāg, 'ihā' xetut ka'ok yūmmūg,

<sup>20</sup> tu' hittup, tu' kuxa yūm ka'ok, Topa te hām'āktux xex tu', tu nōm pu: “Āmax. Xate 'ā' hōm putup 'ūgkutok pit. Ya hāmūn. Puxi',” kaxīy.

<sup>21</sup> Tu hāmyūmmūg, hu: “Topa te 'ā' hōm putup 'ūgkutok pit, tu' ka'ok xe'ēgnāg, nūy tu 'ā' hōm,” kaxīy.

<sup>22</sup> Hu' kuxa yūm ka'ok Topa kopah, ha Topa te' kuxa tupmāhā', pu tu kuxa max.

<sup>23-24</sup> Topa yōg tappet te 'Amanām 'āktux, tu yūmū'ā' 'āktux kamah, yā Topa te' kuxa mām ka'ok xop xohix kuxa tupmāhā', 'ū tu kuxa max, ha yūmūg kuxa mām ka'ok Topa kopah, nōm te yūmūg xuxyā hīnnāhā' putpu', yā Yeyox Kunnix mūn hīnnāhā',

<sup>25</sup> ha te Topa tux hok, pu tikmū'ūn putex, ha yūmūg pupi' xok, nūy yūmūg yōg hāpxopmā'ax kummuk tu' xok hā' pago, ha Topa te putpu' hīnnāhā', nūy yūmūg kuxa kummuk tupmā Topa tu'.

## 5

### *Topa te yūmūg kuxa kummuk tupmāhā'*

<sup>1</sup> Topa te yūmūg kuxa kummuk tupmāhā', yūmūg kuxa mām ka'ok hah. Yā Topa gāy kux, ha yūmūg kuxa mām, nūy tu hittup. Yūmūg xuxyā Yeyox Kunnix te yūmūg kuxa māmāhā',

<sup>2</sup> tu yūmūg mōgāhā', 'ūmōg Topa yōg putat hā. Yā yūmūg kuxa mām ka'ok Kunnix kopah, yīy Topa te yūmū'ā hāmmaxnāhā', ha Topa yōg putat hā yūmūg mōg kumak mōg. Yā yūmūg kuxa hittup, 'īhā' mām ka'ok, tu hāmmax hip, nūy yāyhā tu max xe'ēgnāg, Topa putuk.

<sup>3</sup> Yūmū'āte' hip kamah, 'īhā yūmūg xūy, pāyāk kuxa hittup, 'īhāk xūy kamah. Yā kaxīy yūmūg xūy hā' tot.

<sup>4</sup> Yūmū'āte nōā' tot, ha Topa te' pēnāhā', tu yūmūg putup, yīy yūmū'āte hāmmax hip, nūy yāyhā Topa putuk.

<sup>5</sup> Yūmūg kuxa teknōg 'ohnāg, yā Topa te hām'āktux, tute mō yūmūg yāy xe'ēgnāg 'āktux, ha Topa Koxuk te yūmūg kuxa yūmmūgāhā', tu Topa te mō yūmūg yāy xe'ēgnāg yūmmūgāhā', ha Topa te yāy Koxuk nū'kutnāhā yūmū'ā', yīy hāmmax hip.

<sup>6</sup> Hōmā yūmū'āte Topa hāk puknōg, tu hāpxopmā max hok, ha Kunnix xok, yūmūg pupi' xok, yūmūg kuxa kummuk, yī' xok, ha Topa te 'āmnīy puxet yāykutnāhā', ha Kunnix xok nō'ōm 'āmnīy 'īhā', nūy yūmūg kuxa ka'ogā', 'ūyīy yūmūg hāpxopmā max.

<sup>7</sup> Tikmū'ūn 'ūm te' nōy pupi' xok'ax? 'Ok tik te hāmyok mīy pupi' xok'ax? Yā' ka'ok, nūy nōy yānān tu' xok, pa tikmū'ūn kutōgnāg te tik max 'ūyānān tu' xok'ax.

<sup>8</sup> Pa Topa te mō yūmūg yāy xe'ēgnāg, tu yūmūg yūmmūgāhā', yā Kunnix te yūmūg pupi' xok tap, 'īhā yūmūg kummuk nām!

<sup>9</sup> Ha' xok, nūy yūmūg kuxa kummuk tupmā', pu tu kuxa max, puyīy Topa gāy kuxyā yūmūg pupi'.

<sup>10</sup> Hōmā Topa te yūmū'ā tu' gāy, pa Topak-tok

xok, nŷy yŷmŷg kuxa kummuk xit, nŷy kuxa max tat 'ŷyānān tu', ha hōnhā Topa te yŷmŷ'ā hāk xape', ha Kunnix hi putpu', tu yŷmŷg kopa' xip.

<sup>11</sup> Yŷmŷg kuxa hittup xe'e', yā Topa yŷmŷ'ā hāk xape, xix Yeyox Kunnix te yŷmŷg kuxa hit-tupmāhā', yā yŷmŷg xuxyā', tu Topa gāy kuxyāhā', yŷy Topa hā yŷmŷg xape'.

### *'Anāo xix Kunnix*

<sup>12</sup> Tik te māxap puxet te hāpxopmā kummuk hām xexka tu', hu' xok, hāpxopmā kummuk tu' xok, yī' hep xop xohix xakix'ax, 'ŷxohix te hāpxopmā kummuk tu'.

<sup>13</sup> Hōmā, hāmyāxatamuk xohixnāg hā, 'ap xip'ah Topa yōg xat'ax, ha' hep xop xohix te hāpxopmā kummuk, pāyā Topa te hāpxopmā'ax kummuk mō'kupix 'ohnāg, yā tikmŷ'ŷn te' yōg xat'ax yŷmmŷg hok.

<sup>14</sup> Mōnāyxop hāmāxap 'Anāo 'a' yīpkox pip'ah 'ŷxat'ax pu', tu hāpkummuk mŷy, ha' hep xop xohix te hāpxopmā kummuk, hu' xakix nām, 'ihā 'Anāo xip hāpxexka tu', ha' xohix xakix, tu mōktu mōnāyxop hittap Mōyyex xip, nōm te Topa yōg xat'ax kax'āmi', yā' xohix xakix.

'Anāo yā tikmŷ'ŷn kummuk hā mōnāyxop hāmāxap, ha Yeyox Kunnix 'ŷk-nāy tu' nŷn, nŷy yāyhā tikmŷ'ŷn kuxa tup xop hā mōnāyxop.

<sup>15</sup> ŷyŷmmŷg. Topa te hāmmax nāhā', pāyāp-xet'ah. Topa te hāmhok hā' hāmmaxnāhā', pa 'Anāo te hāpkummugāhā'. Ya hamŷn. 'ŷhep xop xohix xakix, 'Anāo te hāpkummuk mŷy, ha' xakix, pa Topa mŷn max xe'ēgnāg, tu hāmmaxnāhā hāmhok hā', tu tikmŷ'ŷn kuxa kummuk xit, Yeyox xok hā' xit,

nũy kuxa max 'ũyänän tu' tat, Yeyox Kunnix te tikmũ'ün mō'yāy xe'ēgnāg hah.

16 'Ūyũmmũg. Tik puxet te hāpkummuk mĩy, ha Topa gāy, tu: "Yā' kummuk 'ōhōm!" kaxīy. Pa Topa te hāpkummuk mĩy'ax xop pu hāmmaxnāhā', 'ũhok hā hāmmaxnāhā', tu hāpkummuk mĩy'ax xexka xaxogāhā', tu' kuxa kummuk xit, 'ũhok hā' xit, nũy kuxa max tat tu' yänän.

17 Hamũn. Tik puxet te hāpkummuk mĩy, yī' hep xop xohix xakix'ax. Yā hāpxopmā xexkah, tu' xohix pu hāpkummugāhā'. Pa tik nōy te hāpxopmā xexka xe'ēgnāg, 'ũxuxet'ax Yeyox Kunnix, tu hāmmaxnāhā' 'ũxohix pu', nōm xop kuxa mām ka'ok Yeyox kopa' xop pu hāmmaxnāhā', ha Topa te' kuxa kummuk tupmāhā', pu tu kuxa max, ha Kunnix te yũmũ'ā xexkänāp-tup, 'ũyīy nũ mütik yũmũg hi xe'ēgnāg, nũy hi mōkumak mōg.

18 Tik puxet te hāpkummuk mĩy, yī' hep xop xohix xakix'ax, ha hāpxopmā'ax max puxet nōy te' xohix kuxa tupmāhā', tu' hīnnāhā'.

19 Tik puxet te' hep xop xohix pu hāpkummugāhā', tu Topa pu' yīpkox xip 'ohnāg, hu yāy putox xop xohix pu hāpkummugāhā', yā' hep xop xohix te hāpkummuk mĩy kamah. Pāyā tik puxet nōy te' xohix pu hāmmaxnāhā', tu' yīpkox xip Topa pu', hu hāmmaxnāhā', tu' kuxa kummuk tupmāhā'.

20 Topa te' xat'ax hōm, nũy hāpkummuk yũmmũgā', ha hāpxopmā'ax kummuk te' nōy nā' mōg tu mōktu yā' xohix, pa Topa te hāpxopmā hok hā hāmmaxnāhā', tu nōy nā' mōg tu mōktu xohix xexkah.

21 Hōmā tikmū'ūn te hāpxopmā kummuk, ha' kuxa hīy ka'ok, pa hōnhā Topa te hāmaxnāhā', tu' hok hā tikmū'ūn kuxa kummuk tupmāhā', pu tu max, puyīy hāmyok mīy, nūy tu hi xe'ēgnāg mō kuma' yūmūg xuxyā mūtik, nūy Yeyox Kunnix mūtik hāpxopmā'ax xohix xat.

## 6

### *Kunnix tek mūg kuxa tupmāhā'*

1 Yūmū'ātep-tep 'āktux'ax? 'Ok max, yūmūg hāpxopmā kummuk pax, puyīy Topa hāmaxnā xexka'?

2 'Āmhok! Kaxīy hok! Yā yūmūg kuxa mām ka'ok Yeyox kopah, ha Topa te yūmūg kuxa kummuk tupmāhā', pu tu kuxa tup, nūy hāpxopmā kummuk putup hok, nūy kuxyā'. Tikmū'ūn xok, tu hāpxopmā kux, ha kaxīy yūmū'āte hāpxopmā kummuk tu kux kamah,

3 Yūmūg kuxap-xet Yeyox Kunnix kuxa mūtik nūy. Yā yūmūg pupi' xok, 'ūyīy yūmūg hāpxopmā kummuk tu kux, ha tikmū'ūn te yūmūg putox pix, puyī' xohix hāmyūmmūg. Yā Kunnix xok yūmūg pupi', pu yūmūg kuxap-xet yāy kuxa mūtik.

4 Yeyox Kunnix xok, ha nō hāpkot yūmūg pupi kamah, pu yūmū yōg hāpxopmā'ax kummuk xaxogā'. Ha yūmūg putox pix, nūy yūmū'ā hāmyūmmūgā', 'ūyīy hāpkummuk mīy kux. Ha Topa yūmūg Tak te Kunnix putpu hīnnāhā', tu yūmūg ka'ogāhā kamah, 'ūyīy yūmūg hi xe'e Yeyox mūtik, nūy tu hāpxopmā max.

5 Yā Kunnix xok, yūmūg pupi' xok, 'ūyīy yūmū'ā hāpxopmā kummuk tu kux, ha' putpu' hi yūmūg pupi kamah, 'ūyīy yūmūg hi xe'e'.

6 Tu hāmyūmmūg. Hōmā yūmū'āte hāpxopmā kummuk, tu' mīy pax, pa Kunnix te mīpkupnix yīmū tu' xok, yūmūg pupi' xok, nūy yūmūg kuxa tupmā', pu hāpkummuk yūmūg kuxa hīy hok, pu yūmū'ā hāpxopmā kummuk tu kux, nūy yānān tu hāpxopmā max.

7 Tikmū'ūn xok, tu hāpkummuk mīy kux.

8 Kunnix xok yūmūg pupi', 'ūyīy hāpkummuk mīy tu kux, tu' putpu' hi yūmūg pupi kamah, 'ūyīy hi mō'kumak mōg yāy mūtik.

9 'Ūyūmmūg. Topa te Kunnix hīnnāhā' putpu', yīy xe xok putup 'ohnāg. Yā Topa te' hīnnāhā', pu tu hi mō'kuma' mōg.

10 Yā' xok, ha hāpkummuk mī'ax xop te xe Kunnix putex 'ohnāg, 'ap xep xok putup'ah, pa Topa tu' hi xe'ēgnāg.

11 Yā Kunnix xok 'āxop pupi', nūy 'ōg kummuk mīy'ax kuxyā'. 'Ūxaxok hok! Hōnhā Kunnix hi xe'e Topa tu', ha 'ākuxap-xet Yeyox Kunnix kuxa mūtik, nūy Topa tu 'āhi xe'e kamah.

12 Hāpkummuk mīy hok, xix yāy putup'ax mīy hok, xayīy yāy kummugā hok.

13 Topap-xehnāg pu 'īpkox pi', pu tu 'āxat. Yā xa hāmmaxnā xexka! Tu 'āhīnnāhā', ha Topa tu 'āhi', nūy hāmyok mīy, yīy 'ānōy pu 'āyīpkox hok, xayīy hāpkummuk mīy hok.

14 Tikmū'ūn kummuk pu 'āyīpkox hok. Yā yūmūg xat hok. Pa Topa te yūmūg hīnnāhā', 'ap xat'ax te yūmūg hīnnā'ah, pa Topa te yūmū'ā hāmmaxnāhā', tu' hok hā' nāhā', ha yūmūg hi xe'ēgnāg.

*Yūmū'ā Topa hā kāmānat xop*

15 Mōyyex yōg xat'ax tap, ha Topap-xehnāg te nōmhā yūmūg xat, tu yūmū'ā hāmmaxnāhā'. 'Āxop te-putep pe'āpaxex? 'Ok Topa te yūmūg kuxa tupmāhā', 'ūyīy yūmūg hāpkummuk mīy? 'Ap hamūn'ah! Yāmhok!

16 'Āxop te hāmyūmmūg. Tik te' nōy pu' hām, puxix yā' nōy yōg kāmānat, tu' yīpkox pip, tu hām'āpak, nūy tu hām max. Ha kaxīy tikmū'ūn te Topa pu' yīpkox pip, tu Topa hā 'ūyōg kāmānat, ha nōm pu hāmmaxnāhā', tu' kuxa kummuk tupmāhā', pu tu kuxa max. Pāyā tikmū'ūn yīpkox hok, puxix tu hāpxopmā kummuk, tu yāy kuxa tupmā hok. Yīy Topa te nōm putup nōg, 'ūkuxa kummuk hah. Yā yāy kummugāhā'.

17 Nū mōy Topa pu hām'āktux, nūy: "Āmax Topah!" kaxīy. Yā hōmā 'āxop te hāpxopmā kummuk, pāyā hōnhā Topa pu 'āyīpkox pip, hām'āpak max 'āpak'ax tu', ha tikmū'ūn te xa hāmyūmmūgāhā', tu xa hāpxe'e yūmmūgāhā', yīy 'ākuxa tep-tup, tu' hittup xexka'.

18 Hōmā 'ākuxa hittup 'ohnāg, hāpxopmā kummuk tu', pāyā nōmhā Topa yōg putat hā 'āmōg, nūy hāpxopmā max, nūy Topa yōg putup'ax māynāg mīy, hu 'ākuxa hittup xexka'.

19 'A 'āxop te hāmyūmmūg'ah, yīy 'āte hām'āktux'ax hā xa hāmyūmmūgāp-tup. Hōmā 'āxop te' xak, nūy hāpkummuk mīy, tu' mīy pax, tu 'ānōy hā'xupxet, tu 'ānōy kummugā pax, Hu mōy, hōnhā xax, nūy Topap-xehnāg pu hāpxopmā max, xayīy 'āhi xe'e', xayīy 'ānōy pu hāmmaxnā'.

20 Hōmā 'āxop te hāpxopmā kummuk pax, tu Topa pu 'āyīpkox 'ohnāg.

21 Nāy 'ūxutigā', nūy 'ōg hāp̄xopmā'ax kummuk pe'āpaxeh. 'Ok 'āhittup, 'īhā hāmp̄e'āpaxex? 'Ok pe xate yāyhāhup? Yā xate yāyhāhup, hāp̄xopmā kummuk tu'. Hōmā 'ākuxa hittup 'ohnāg, yā Hāmgāyāgnāg Pet ha 'āmōg'ax.

22 Pa Topa te 'ākuxa ka', tu 'ākuxa kummuk tupmāhā', xa kuxa max, nūy Topap-xehnāg pu 'āxop hāp̄xopmā max, nūy 'āhi xe'ēgnāg mō kuma 'āmōg.

23 Tikmū'ūn te hāp̄xop kummuk hā yāy kum-mugāhā 'ūyānān tu', nūy pago, hu ta xakix. Pa Topa te hāmmāxnāhā', 'ūhok hā hāmmāxnāhā', nūy tikmū'ūn hīnnā xe'ēgnāg. Yeyox Kunnix xok hā' hīnnāhā', nō'ōm yūmūg xuxyā xe'e', ha yūmūg kuxap-xet Kunnix kuxa mūtik.

## 7

### *Paot te yāyta'ax xop hā hāmyūmmūgāhā'*

1 'Ūkxape xop, 'āxop xohix te' xat'ax yūmmūg, hu hām'āktux yūmmūg kamah yōgnū'. 'Ūxat'ax yā' xat tikmū'ūn xohix, ha ta' xakix xop 'ap xat'ah.

2 'Ūyūmmūg. 'Ūn yāytaha', ha' xat'ax te 'ūgmīy ka'ok, tu' yīpxox mūggā ka'ok, pa' yīpxox xok, puxix 'ūhīy'ax koa', ha ta' nīm, tu' hok yūm.

3 Kaxīy, 'ūn te tik nōy mūtik nōm 'īhā' yīpxox xip, puxix tikmū'ūn te: “Yā 'ūn kummuk, tu' nōy hā' xupxet,” kaxīy. Pa 'ūn yīpxox xok, puxix tup-xehnāg, nūy hok yūm, tu nōm pu' yīpkox xip kux, yā' max, 'ūn te tik nōy mūy, nūy nū mūtik yāytax.

4 'Ūkxape xop, yā kaxīy 'āxop te 'āhok pip xop putuk. Yā Kunnix xok 'īhā Mōyyex yōg xat'ax pu 'āyīpkox kux, nūy hōnhā Kunnixp-xet pu 'āyīpkox



pi'. Yā 'āxop te Kunnix hā' yīn xexka', tu yā hōnhā 'ūyōg, ha putpu' hi', 'ūyīy yūmūg hāpxopmā max Topa pu'.

<sup>5</sup> Hōmā yūmū'āte hāpxopmāhā', tu yā yāy yōg putup'ax xohix mīy, tikmū'ūn xop xohix putuk, yūmū'āte' mīy, ha' xat'ax te hāpkummuk mīy xat hok, 'ūmīy hok, hu hāpkummuk mīy putup xūy, tu mōktu yūmūg xakix.

<sup>6</sup> Pa hōnhā yūmūg hok pip, ha yūmūg hīy'ax koa', yūmūg hok pip, nūy Topap-xehnāg pu hāpxopmā max. Topa Koxuk te yūmūg hīnnāhā xe'e', tu yūmūg putox kummuk tupmāhā, ha' xat'ax hittap te yūmūg xat kux.

<sup>7</sup> Yūmū'ātep-tep 'āktux'ax? 'Ok xat'ax kummuk? 'Āmhok' Yā' max, pāyā' xat'ax tek mūn pu hāmyūmmūgāhā', 'ū yūmmūg, 'ok pe' max, 'ok pe' kummuk. 'Ūxat'ax tek xat hok, 'ūyīy hāpxop putup xūy hok. Paxpuk xat hok, kopxix hāpxop putup xūy hok, pa hōnhā 'āte hāmyūmmūg, hu hāpxop putup xūy xe'e'.

<sup>8</sup> Yī' xat'ax tek xat, 'ūyīy tuk nōy yōg hāpxop putup xūy hok, hu 'āte hāpxop putup xūy. Paxpuk xat hok, kopxix Topa yōg hāmpē'paxex yūmmūg hok, xix yāy yōg hāpxopmā'ax kummuk yūmmūg hok. Yā Topa pa te hāmyūmmūg xe'ēgnāg, hu' xat, 'ūyīy hāpxopmā max.

<sup>9</sup> Hōmā 'āte' xat'ax yūmmūg 'ohnāg, tu hāmpēkaxex, hu: "Yā 'āte hāpxopmā max," kaxīy. Pa Topa tek xat, 'ūyīy hāpkummuk mīy hok, ha 'āte' xupak, tu hāmyūmmūg, tu yāy kuxa kummuk yūmmūg,

<sup>10</sup> hu yāy kuxa tu teknōg. Yā Topa te' xat'ax hōm,

puyïy tikmũ'ün hïnnã', pak yũmmũgãhã', 'ü yũmũ yã yõg hãpxopmã'ax kummuk.

11 'Äte hãpkummuk mïy, hu yãy pu mõ'ãmã', tu yãy mün max pek'paxex, pãyã' koit. Hu 'äte yãy kuxa putex, tu: "Äte Topa yõg xat'ax mïy hok." Kaxïy.

12 Yã Topa yõg xat'ax max xe'ëgnãg, tu hãpxe'e'.

13 Tepte xïy? 'Ok hãpxop max tek kummugãhã'? 'Ämhok! Pãyã 'äte hãpkummuk mïy, ha Topa yõg xat'ax max, tu yõgnũ hãpxopmã'ax kopit, nũy 'ügmün yũmmũgã', yã 'äte hãpkummuk mïy xe'e'.

*Tikmũ'ün kuxa te yãy tuk-mïy*

14 Yũmũ'äte hãmyũmmũg. 'Üxat'ax yã Topa yõg, hak mün pu'uk, hu hãpxopmã kummuk pax, tu hãpxopmã kummuk mõ kumak mõg.

15 'İntu'. 'Äte hãpxopmã maxp-tup, pãyã 'ap mïy'ah, tu hãpxopmã kummuk putup nõg, pãyã 'ümïy.

16 Tu hãpxopmã kummuk, 'İhã nõm putup nõg, kopxix: Yã hamün. Topa yõg xat'ax max xe'e'. Kaxïy.

17 'Ak mün te' mïy'ah, pãyã hãpkummuk tek kuxa kopa' xip mün te' mïy.

18 'Äte' xak, nũy hãpxopmã max, pãyã 'a' mïy yũmmũg'ah 'äte', 'ügxuxa kummuk tu'.

19 Tu' xak, nũy hãpxopmã max, pãyã 'a' mïy'ah, tu' yãnãn tu hãpxopmã kummuk.

20 'A' äte hãpkummuk mïy putup'ah, pãyã' mïy, yïy hãpkummuk tek kuxa kopa' xip tek kummugãhã',

21 yïy 'äte hãmyũmmũg. 'Äte hãpxopmã max putup, 'İhã hãpxopmã kummuk 'üp-xehnãg.

22 'Ügxuxa te Topa yõg xat'ax hã' hittup,

<sup>23</sup> päyã 'ãte hãpkummuk mÿy pax, 'ügkuxa kummuk tu'. Tu hãpxopmã max xak, päyãg kuxa kummuk tuk hÿy, 'ü hãpxopmã max hok.

<sup>24</sup> Huk hittup 'ohnãg. 'Û 'üm mÿn tek ka'ogã'ax, 'ãte hãpxopmã max?

<sup>25</sup> Topa tek ka'ogãp-tup, yÿy 'ãte: “Topa 'ãmax,” kaxÿy. Yã Yeyox Kunnix te 'ü 'üm hã 'ãtehet.

Kaxÿy 'ügkuxa kopa 'ãte' xak, nÿy Topa yõg xat'ax 'ügyÿpkox xihp, nÿy 'ügmãynãg mÿy, päyã 'ãte' mÿy yÿmmÿg'ah, hu hãpkummuk mÿy pax.

## 8

### *Topa Koxuk tek mÿg ka'ogãhã'*

<sup>1</sup> Topa te yÿmÿg kummuk 'üm 'ãktux'ah nõmhã, yã yÿmÿg kuxap-xet Yeyox Kunnix kuxa mÿtik, ha Topa te yÿmÿg 'üm 'ãktux kummuk 'ohnãg Yeyox Kunnix hah.

<sup>2</sup> Topa Koxuk te yÿmÿg hÿnnã xe'e Yeyox Kunnix mÿtik, tu yÿmÿg mõy, pu' xat'ax yÿmÿg kuxa hÿy hok, 'üyÿy yÿmÿg hãpkummuk mÿy hok, nÿy yÿmÿg xakix hok kamah.

<sup>3</sup> 'Ûxat'ax te yÿmÿg 'üm kuxa tupmã'ah. Yÿmÿ'ãte yãy putup'ax mÿy, yÿy hãpxopmã kummuk pax, pa Topa ka'ok, tu yÿmÿg kuxa tupmãhã', pu tu kuxa max, tu hãpxopmã'ax kummuk 'ãktux kummuk kamah, huk-tok pit nÿ'kutnãhã', ha yãyhã tikmÿ'ün kutok nÿy hãpkummuk kuxyã',

<sup>4</sup> 'üyÿy yÿmÿg hãpxopmã max, nÿy tu' xat'ax xohix pu yÿmÿg yÿpkox pi', yã' xat'ax max xe'e'. Ha Topa Koxuk te yÿmÿg ka'ogãhã', 'üyÿy yãy putup'ax mÿy hok.

<sup>5</sup> Tikmũ'ün te yāy putup'ax mīy, puxix tute hāpkummuk mīy, pa tikmũ'ün te Topa Koxuk pu' yīpkox pip, puxix tu hāpxopmā max, Topa Koxuk pekpaex tu'.

<sup>6</sup> Tikmũ'ün te yāy putup'ax mīy, puxix tu xakix, hāmp'e'paxex kummuk tu', pa tikmũ'ün te Topa Koxuk pu' yīpkox pip, nūy hāpxopmā max, puxix tu hi xe'e', tu' kuxa mām max, Topa Koxuk pe'paxex tu'.

<sup>7</sup> Yīy tikmũ'ün gāy, tu Topap-tup nōg, nūy yāy putup'ax mīy, tu yā hāmp'e'paxex kummuk, tu Topa yōg xat'ax pu' yīpkox 'ohnāg, tu' mīy 'ap yūmmūg'ah,

<sup>8</sup> yīy Topa te nōm xop putup hok, nōm te yāy putup'ax mīy pax.

<sup>9</sup> Pa 'āxop te yāy putup'ax mīy 'ohnāg. 'Āmhok. 'Āxop te Topa Koxuk pu 'āyīpkox pip. 'Āxop te nōm pu 'āyīpkox pi', puxix Topa Koxuk 'ākopa xip. Tikmũ'ün te Kunnix Koxuk xip hok, puxix Kunnix yōg hok.

<sup>10</sup> Kunnix te 'ākopa' xip, puxix Topa Koxuk 'āhīnnā', Topa te 'ākuxa tupmāhā hah, pa 'āyīn xok putup, xate hāpkummuk mīy pax hah.

<sup>11</sup> Topa Koxuk te Yeyox Kunnix hīnnāhā' putpu', tu 'ākopa' xip, yīy kamah hīnnāp-tup putpu 'āxop yīn, yā hōnhā' xip 'ākopah.

<sup>12</sup> 'Ūkxape xop: Yā Topa te yūmũ'ā hāmmaxnāhā', yīy yūmũ'āte tu ta nemēn. 'Āpu yūmũ'ā yāy yōg putup'ax mīy hok.

<sup>13</sup> 'Āxop te' mīy, hu ta xok, pa Topa Koxuk pu 'āyīpkox pip, hu ta yā hi xe'ēgnāg.

<sup>14</sup> Tikmũ'ün te Topa Koxuk pu' yīpkox pip, yā 'ōhōm Topak-tok xe'ēgnāg.

15 Yā Topa Koxuk te 'ākuxa kummugā 'ohnāg, pa' hittupmāhā', nūy tu kuxānōg hok. 'Ūyūmmūg, Yūmū'āte yāyhā Topak-tok xop, pu yūmūg ka'ogā', 'ūyīy Topa pu hām'āktux, hu: "Tak, yōgnū 'Ātak!" kaxīy.

16 Ha Topa Koxuk te yūmūg koxuk pu hām'āktux, nūy yūmū'ā Topak-tok xop 'āktux.

17 Yūmūg yā Topak-tok xop, hu pexkox yōg hāpxop max xohix pop putup, Topa te nōm xex yāy yōg tikmū'ūn pu', ha yūmū'āte' pop putup Kunnix mūtik. Yā Topa te nōm hāpxop max xex Kunnix pu', tu pexkox kopa' xex, ha yūmū'āte hāpxop mō'koxip putup Kunnix mūtik. Nōm mūtik yūmūg xūy, koxix yūmūg yāyhā max xe'ēgnāg Kunnix putuk.

*Yūmū'āte yāyhāp-tup max xe'ēgnāg*

18 'Āte hāmpē'paxex, hu: Yūmūg xūy kutōgnāg nōmhā, tuk kuxa hittup xe'ēgnāg putup hōmā, 'ihā hāptup xe'e nōy punethok mō'nāhā', 'ihā yūmūg yāyhāp-tup max xe'ēgnāg.

19 Topa te yōnnā'ī xohix mīy, ha' hip, tu' xak, pu Topa nōm tu yāy yōg kutok xop mūg.

20 Hōmā hāpxopmā'ax xohix yāyhā hitop, Topa tep-tup hah, ha hāmmax hip,

21 puyīy Topa tux hok, pu tik-tox hok, 'ū yāyhā max xe'ēgnāg, Topak-tok xop xohix mūtik.

22 Yūmū'āte hāmyūmmūg, nōm yōnnā'ī xop tu' kokōn, tu' xūy, 'ūn tek-tok put putup, tu' xūy, tu' kokōn, ha kaxīy yōnnā'ī xohix xūy pu Topa' hitupmā'.

23 Pāyā' hok pip'ah. 'Āmhok. Yā yūmū'āte kopa yā' kokōn kamah, ha Topa te yūmū'ā yāy Koxuk hok

hōm hāmāxap, ha' hip, nūy yūmūg yāyhā Topak-tok xop, yā yūmūg tupmāhā, 'ūyīy yūmūg tup mō'kumak mōg.

24 Yā yūmūg kuxa tupmāhā', yūmūg kuxa mām ka'ok ha' tupmāhā', ha yūmū'āte hāmmax hip. 'A hōnhā yūmū'āte' pēnā'ah, tuk kuxa mām ka'ok, hu hāmyūmmūg, yā yūmū'āte' pēnāp-tup. Pax pu tikmū'ūn hāmpēnā', puxi' hip 'ohnāg.

25 Pa tikmū'ūn te' pēnā hok, puxix tu kuxa mām ka'ok, tu hāmmax hip, puyīy Topa 'ā' mīy.

26 Ha Topa Koxuk te mō yūmūg nīynām, yūmūg kuxa pu'uk hah. Ha yūmū'āte Topa mūtik hām'āktux yūmmūg'ah, yīy Topa Koxuk te Topa tu ta tu' xak, yūmūg pupi tu' xak, 'ūkokōn 'īhā yūmūg pupi' xak, nūy 'ūyīy hok hā hām'āktux, nūy Topa pu hām'āktux.

27 Ha Topa te tikmū'ūn kuxa kopa pēnāhā', tu yāy Koxuk pe'paxex tu' yūmmūg, ha yāy Koxuk xe'ēgnāg te Topa tu' xak, yāy yōg tikmū'ūn pupi' xak, tu Topa yōg putup'ax yūmmūg.

28 Topa te yūmū'ā hāmmaxnāhā', tu hāmmaxnāp-tup mō'kuma' mōg, tu hāpxopmā'ax xohix hā yūmū'ā hāmmaxnāhā'. Yā yūmū'āte Topap-tup pax xexka', yūmūg yīmōgatux hah, tu yūmūg xānāhā', mō yūmūg yāy xe'ēgnāg tu', ha yūmū'āte' yūmmūg, hu yūmūg kuxa mām.

29 Topa te yūmūg yīmōgatux tap, tu yāy pu yūmūg pop, 'ū yūmūg yāyhā 'āhā tuk-tok putuk, pu Kunnix yā māxap, ha yūmūg xohix yā nōm mō nū kuhmōy.

30 Ha Topa te yāy pu yūmūg pop tap, xix yūmūg xānāhā', xix yūmūg kuxa tupmāhā', pu tu kuxa max, 'ūyīy yūmūg yāyhā max xe'ēgnāg, Kunnix

putuk.

*Topa te mõ yümüg yäy xe'ëgnäg Yeyox Kunnix hä*

<sup>31</sup> Hamün, yīy yümū'ātep-tep 'āktux'ax? Topa te yümū mūtik tihī', yīy tikmū'ün kummuk te hitop tu yümū'ā hāpkummugāhā'.

<sup>32</sup> Topa te yāy kutok pit puxet kumīy 'ohnäg, pa yümū'ā' hõm. 'Ük-tok hõm yümū'ā', puxix tu hāpxop xohix yümū'ā' hok popmāp-tup kamah.

<sup>33</sup> Topa te yāy yõg tikmū'ün yīmõgatux. 'Ok tik 'üm xip, nūy 'ükummuk 'āktux? 'Ap tik 'üm xip'ah, yā Topa mün te' kuxa tupmāhā', pu tu kuxa max.

<sup>34</sup> Yīy tikmū'ün 'üm 'a' kummuk 'āktux'ah. Kunnix xok, yā putpu' hi', tu Topa yīpxe'e hā' xip, tu yümüg pupi Topa tu ta tu' xak,

<sup>35</sup> tu mõ yümüg yäy xe'ëgnäg. 'Ap tikmū'ün 'üm xip'ah, xix hāpxopmā'ax 'üm xip'ah, nūy Topa pu' hupmā hok, puyīy Topa yümüg putup hok. Yümüg xūy xix hāpxop xak'ax tat punethok, xix tikmū'ün te yümüg xūygāhā', ha putup te yümüg kix, ha topixxax 'üm yümüg xip hok, xix tikmū'ün kummuk te' xak, nūy yümüg kix, puxix Kunnix mün mõ yümüg yäy xe'ëgnäg, tu yümüg nīm 'ohnäg.

<sup>36</sup> Topa yõg tappet te: “Ämnīy xohix hā tikmū'ün te yümüg putup nõg, tu yümüg kix putup, yümū'ā yā Topa hā tikmū'ün hah. Tikmū'ün te kahnēn mõgāhā', nūy putex, ha taxīy yümüg mõgāhā', nūy yümüg kix,” kaxīy.

<sup>37</sup> Pâyā tute yümüg nõā hok, Yeyox Kunnix te mõ yümüg yäy xe'ëgnäg hah, yīy yümüg kuxa hittup xexka', ihā pexkox ha yümüg mõg kumak mõg.

<sup>38</sup> Yīy 'āte hāmyümmüg. Kunnix te mõ yümüg yäy xe'ëgnäg, tu yümüg nīm 'ohnäg. Pe yümüg hi',

pe yūmūg xakix, puxix Kunnix yūmūg nīm hok. Pexkox yōg xop xix yāmīy xop te yūmūg nīm mā hok, ha hōnhā Kunnix te yūmūg mūtik tihi', tu hāptup hā yūmūg mūtik hi putup, xix hāptup nōy xohix hā Kunnix te yūmūg 'ūm nīm putup'ah, mō yūmūg yāy xe'ēgnāg tu'.

<sup>39</sup> Yā pexkox yōg xop te Kunnix nīm māp-tup hok yūmū'ā', xix hām xexka xix hām kaka' pip xop te yūmū'ā nīm māp-tup hok kamah. 'Ap xip'ah hāpxopmā'ax te Topa pu hupmāhā', puyīy yūmūg nīm, ha mō yūmūg yāy xe'ēgnāg, yūmūg xuxyā Yeyox Kunnix hā Topa te mō yūmūg yāy xe'ēgnāg.

## 9

### *Topa xix yāy yōg tikmū'ūn*

<sup>1</sup> Āte xa hāpxe'e 'āktux: 'Ūgmūn yā Kunnix yōg, hu 'ap koit'ah. Topa Koxuk tek kopa' xip, tuk kuxa pu hāmyūmmūgāhā', tu: “A xatep koit'ah,” kaxīy.

<sup>2</sup> 'Ūgkuxa hittup 'ohnāg, yāk kuxa xūy, 'ihā 'āte yāy yōg tikmū'ūn pe'paxex. Yāk xape xe'e Yoneo yōg tikmū'ūn, 'ūgmūg hep puxet tu'.

<sup>3</sup> Āte hām'āktux'ax hu: Pūyā Topa 'ūgkummugā', nūy 'ūkxape hā hāmmaxnā'! Tu xe hām'āktux'ax, hu: Pūyā Kunnix 'ūgnīm, nūy tuk xape mō'nīynām 'ūyānān tu'.

<sup>4</sup> Nō'ōm yā Topa yōg tikmū'ūn, ha' yīmōgatux, pu Topa hāk-tok xop, ha Topa te' xexkanāhā', yāy mūtik, tu' pa'ax mīy nōm xop mūtik, tu tu' xat'ax hōm. Yā 'ōm te Topa xak, tu' yēy Topa keppah, ha Topa te nō'ōm mūtik hām'āktux xex.

<sup>5</sup> Ha mōnāyxop hittap mōkputox, ha Kunnix mūn kama mōnāyxop hā mōkputox. Pūyā' xohix Topa



xexka 'āktux mō kuma' mōg, 'ūxexka xe'ēgnāg hah. Hamūn.

<sup>6</sup> Pa 'a Topa te hām'āktux hitop tu' xex'ah. 'Āmhok. 'Ap kaxīy'ah, pāyā 'Iyaet yōg tikmū'ūn xohix 'a Topa yōg'ah. 'Āmhok. Topa te 'a xohix yīmōgatux'ah.

<sup>7</sup> Yā Mōnāyxop hittap nām 'Amanām mōkputox, pāyā' yāg Topa hā yāy kutok xop. 'Ap xohix'ah. Yīy hōmā Topa te 'Amanām pu hām'āktux, hu: “Āk-tok 'Iyak mōkputox yā 'āmōkputox xe'e', 'ap nōy xop 'ūm 'āmōkputox'ah. Yā' puknōg,” kaxīy.

<sup>8</sup> Yīy Topa te 'Amanām mōkputox xohix 'ap putup'ah, pa hām'āktux xex 'Amanām mūtik hu: “Āk-tok 'Iyak mōkputox, nō'ōm 'āmōkputox xe'e', 'āte xa hām'āktux xex hah,” kaxīy.

<sup>9</sup> Tu hām'āktux xex, hu: “Hāpxip 'īhā' putpuk nūn'ax, ha 'āxetut Xat tek-tok put putup,” kaxīy.

<sup>10</sup> Ha 'Iyak xetut Hemek, tuk-tok pit 2 pop, ha' tak 'Iyak 'ūp-xet,

<sup>11-12</sup> pa Topa tek-tok puxet yāy kutnā tap, hak-tok 2 te' tut tex kopa tihi', 'īhā Topa te' tut pu hām'āktux, hu: “Āk-tok hāmāxap te' taknōy pu' hām putup, tu' taknōy 'ūk-nāy tu' nāhā pu' hām putup,” kaxīy. Pa Topa te hām'āktux, 'īhāk-tok 2 te' tut tex kopa' tihi', tu hāpxopmā 'ohnāg, pe' māx, pe' kummuk, pa Topa te' yāy kutnā tap,

<sup>13</sup> yīy Topa yōg tappet te: “Āte Yako putup pax, tu 'Eyao putup nōg,” kaxīy.

<sup>14</sup> Yūmū'āte putep 'āktux'ax? 'Ok Topa te hāpxopmā kohe'? 'Āmhok.

<sup>15</sup> Tu Mōnāyxop Mōyyex pu hām'āktux, hu: “Āteputup, nūy tikmū'ūn 'ūm kuxa ka', kopxi' kuxa ka'. Yā puxi',” kaxīy.

16 'Ūyūmmūg. Topa te nōm tikmū'ūn kuxa ka', 'ok pe tikmū'ūn tep-tup, 'ok pep-tup hok, 'ok pe tikmū'ūn te hāpxopmāhā', pe hāpxopmā hok, pāyā Topa te' kuxa ka'.

17 Topa yōg tappet te Pana'o hittap 'āktux, ha Topa te nōm pu hām'āktux, hu: “Āte 'āxexkanāhā', nūy xa hāmyūmmūgā', xayīy 'ūgmūn ka'ok yūmmūg, puyīy hām xexka xohix yōg tikmū'ūn tek xuxet'ax yūmmūg,” kaxīy.

18 Yīy Topa tep-tup, nūy tikmū'ūn kuxa ka', puxi' kuxa ka', tup-tup, nūy tikmū'ūn nōy kuxa māmā hok, puxi' mām 'ohnāg.

*Topa te tikmū'ūn kuxa ka', tu hāpkummuk hā' yānān kamah*

19 Pa tikmū'ūn te: “Ok Topa te hāpkohe mīy, īhā tikmū'ūn kummuk 'āktux? Topa te tikmū'ūn kuxa māmā hok, puxix tikmū'ūn kuxa mām 'ohnāg, Topa mūn tep-tup hah,” kaxīy.

20 Nāy. Yāy pe'āpaxex xexka hok. 'Āk-tōgnāg, ha Topa mūn xexka xe'ēgnāg. Xate putōy putuk, nōm hā tikmū'ūn te nax mīy. Pax pu putōy te: “Tep tu xāhā nax?” kaxīy.

21 Nāy. Tikmū'ūn te putōy hā nax mīy, yā hāmyok miy, tu' nax hu' mīy, tu naxtox nūnnāp-tup, hu' mīy. 'Ūp-tup, hu' mīy, ha' yāg māynāg, xix 'ūnōy max miāx.

22 Ha kaxīy Topa te hāmyok mīy. Tute' xohix pu' gāy yūmmūgāp-tup, pu' xohix Topa yā 'ūka'ok yūmmūg, yīy tikmū'ūn kummuk hā' tot, tu nōm koxyōy'ax.

23 Tu' max xe'ēgnāg, tu yūmū'ā hāmmaxnāhā', tu yūmū'ā hāmyūmmūgāhā', 'ū yūmmūg. Yīy Topa

te yũmũg kuxa ka', 'ũ yũmũg yãyhã max xe'ëgnãg kamah, hamũn mũtik,

<sup>24</sup> tu yũmũg xãnãhã', Yoneo yõg tikmũ'ũn kopa 'ũyãg xãnãhã', xi' puknõg xop kopa 'ũyãg xãnãhã'.

<sup>25</sup> Hõmã 'Oyex te Topa pupi hãm'ãktux, tu tappet tu kax'ãmi', hu:

“Åte' puknõg xop putup, yã yõgnũ tikmũ'ũn, hõmã 'ãte tu nõm xop putup nõg, pãyã hõnhã nõm mõ'yãy xe'ëgnãg.

<sup>26</sup> Õnte Topa xe'ëgnãg te nõm xop pu hãm'ãktux tap, tu:

'Yã 'ãxop puknõg, 'ap yõg'ah tikmũ'ũn, kaxĩy.

Yã 'õnte Topa xe'ëgnãg te yãy yõg tikmũ'ũn 'ãktux putup,

yã Topa hi xe'ëgnãg,” kaxĩy.

<sup>27</sup> Ha 'Iyait kama te Topa pupi ham'ãktux, tu: “Yoneo yõg tikmũ'ũn xohix punethok yã 'ãmot xap xohix punethok putuk, pa 'ãtek-tĩgnãg yĩmõgatux, nũy kuxa kummuk xit, nũy kuxa max mõ'tat 'ũyãnãn tu'.

<sup>28</sup> 'Ûgnũn mõ'ka'ok, tu' hep xop xohix tu pagop-tup, tu' kummugãp-tup 'ũyãnãn tu',” kaxĩy.

<sup>29</sup> Hõmã 'Iyait te Topa pupi hãm'ãktux, tu: “Pax pu Topa xe'ëgnãg yũmũg mõkputox xohix kix, puxix yũmũ yõg kõmẽn te Xonõm putuk, xix Gõmõg putuk, yã' hok yũm,” kaxĩy.

*'Iyaet yõg tikmũ'ũn te hãm'ãpak max'ax 'ãpak*

<sup>30</sup> Yũmũ'ãtep tep 'ãktux'ax? Nũhũ': Yã' puknõg te Topa xak ohnãg, tu hãpxopmã max hok Topa pu', pa Topa te' kuxa tupmãhã', pu tu kuxa max, 'ũkuxa mãm ka'ok tu',

<sup>31</sup> Īhã Yoneo yõg tikmũ'ũn te Topa yõg xat'ax xak, nũy Topa pu' xat'ax hã yãy kuxa tupmã', tu' tupmã hok.

<sup>32</sup> Tep tu' tupmã hok? 'Ūkuxa mãm 'ohnãg, tu hãpxopmã punethok, nũy yãyhã 'ũmax, hu' kuxa mãm 'ohnãg Topa kopah. Tu tikmũ'ũn putuk, nõm tikmũ'ũn te mĩkaxxap xexka yĩmũ hãm tu' nãhã', ha mĩkaxxap yĩmũ' nãhã'.

<sup>33</sup> Yã Topa yõg tappet te Kunnix 'ãktux, Īhã mĩkaxxap xexka 'ãktux, tu: "Pẽnã! Yĩktix Xiãm tu 'ãte mĩkaxxap xexka mõ'yũm, pu tikmũ'ũn hãm tu nã', mĩkaxxap te' kup hã' tak, ha' nãhã',

ha tikmũ'ũn kuxa yũm ka'ok mĩkaxxap kopah, puxix tu yãy pu' hũpmã hok," kaxĩy.

Yã tappet te Kunnix 'ãktux, nũy tikmũ'ũn kuxa mãm'ax yũmmũgã'.

## 10

<sup>1</sup> 'Ūkxape xop, 'ãte' xak, puyĩy yõgnũ tikmũ'ũn kuxa mãm ka'ok Yeyox Kunnix kopah, ha 'ãte Topa tu' xak pax tikmũ'ũn pupi',

<sup>2</sup> tu hãmyũmmũg, ha Topap-xehnãg xak, pa hãmyũmmũg 'ohnãg.

<sup>3</sup> 'Ap kuxa tupmã yũmmũg'ah, tu yãy pe'paxex hã yãy kuxa kummuk tupmãp-tup, pa Topap-xehnãg te tikmũ'ũn kuxa tupmãhã', pu tu kuxa max.

<sup>4</sup> Ha Kunnix nũn, nũy mĩpkupnix tu' xok yũmũg pupi', puyĩy tikmũ'ũn kuxa mãm ka'ok 'õm kopah, puxix Topa' kuxa tupmã', pu tu kuxa max, yĩy Yoneo xop hitop tu' xat'ax mĩy. Yã' kuxa tupmã hok.

*Topa te tikmũ'ũn xohix kuxa kummuk xit'ax*

<sup>5</sup> Mōnāy xop hittap Mōyyex te' xat'ax 'āktux, hu: “Tikmū'ūn yīpkox pip 'ūxat'ax pu', puxi' xat'ax nōm hīnnāp-tup,” kaxīy. Ha kaxīy 'ūxat'ax te tikmū'ūn kuxa tupmāhā Topa pu', 'ihā tikmū'ūn te nōm pu' yīpkox pip, ha Mōyyex te tu' xuktux.

<sup>6</sup> Pa Topa yōg tappet te hām'āktux nōy yā kamah, tu Topa te tikmū'ūn kuxa tupmā 'āktux, tu Topa te' kuxa mām ka'ok xop kuxa tupmā 'āktux, hu: “Ūyīpkopit hok, hu: “Ū 'ūm te pexkox tu' mōg putup, nūy yūmūg kuxa kummuk tupmā'?” ” kaxīy. Tu Kunnix nū'kutnā'ax 'āktux, yā' nūn tap, nūy yūmūg kuxa tupmā'.

<sup>7</sup> Tu xe' yīkopit, hu: “Ū 'ūm te xakix xop pet ha' mōg putup, nūy yūmūg kuxa tupmā'?” kaxīy. Yā Topa te Kunnix putpu' hīnnā tap 'āktux.

<sup>8</sup> Tu xe hām'āktux, hu: “Topa te hām'āktux, tu hām'āktux 'ūm mō'kutnāhā xa', ha 'āxop te hām'āpak, tu xe' xuktux, yā 'ākuxa kopa' xip,” kaxīy. Hak mū'āte Topa yōg hām'āktux'ax xa' xuktux, xayīy 'ākuxa yūm ka'ok Topa kopah.

<sup>9</sup> Ok xatep-tup, pu Topa 'ākuxa kummuk xit, nūy kuxa max mō'tat 'ūyānān tu'? Xatep-tup, 'āpu 'ānōy pu hām'āktux, hu: Yeyox mūn yāk xuxyā'! Kaxīy. Tu 'ākuxa yūm ka'ok Yeyox Kunnix kopah, Topa te' putpu hīnnāhā hah. Xate hāpxopmā kaxīy, puxix Topa 'ākuxa kummuk xit, nūy kuxa max tat 'ūyānān tu'.

<sup>10</sup> Yūmūg kuxa mām ka'ok, ha Topa te yūmūg kuxa tupmā', pu tu kuxa max, yūmū'āte' yīkox hā xuktux, puxix Topa yūmūg kuxa kummuk xit.

<sup>11</sup> Topa yōg tappet te: “Tikmū'ūn kuxa yūm ka'ok nōm kopah, puxix tu yāy pu hupmā hok,” kaxīy.

12 Ha' hep xop xohix pu hāmmaxnāhā', nōm xop kuxa mām ka'ok Topa kopah, tu Topa pu yāy putuk, Yoneo yōg tikmū'ūn xi' puknōg xop. Topa yā yūmūg xuxyā', tu hāmmaxnāhā 'ūhep xop xohix pu', nōm xop te Topa tu' xak, pu hāmmaxnā'.

13 Topa yōg tappet te xe: “Topa te' hep xop xohix kuxa kummuk xit putup, nūy kuxa max yānān tu' tat, nōm xop te Topa tu' xak, pu' xit,” kaxīy.

14 Pa' hep xop punethok te ta tu' xak hok, 'ūkuxa mām 'ohnāg tu', hu hām'āpak 'ohnāg. Tu hām'āpak hok, tikmū'ūn te hām'āktux 'ohnāg hah.

15 Tu hām'āktux hok, tikmū'ūn te mō'kutnā 'ohnāg hah. Topa yōg tappet te: “Yā' max tikmū'ūn nū', nūy hām'āpak'ax max 'āktux,” kaxīy.

16 'A' xohix tep-tup'ah. Hōmā mōnāyxop hitap 'Iyait te Topa pupi hām'āktux, tu kax'āmi', tu: “Topah, pi'yā' yīpkox 'ūm pip 'ūgmū'āte hām'āktux?” kaxīy.

17 Yīy tikmū'ūn te Kunnix 'āktux'ax 'āpak hāmāxap, tuk-nāy tu' kuxa yūm ka'ok nōm hām'āktux'ax kopah.

18 Pa 'āte xe' yīkopit, hu: 'Ok tikmū'ūn te hām'āpak hok? HamŪn. Yā' xupak. Topa yōg tappet te:

“Tikmū'ūn xohix te' yīy'ax 'āpak,  
yā hām xexka xohix yōg tikmū'ūn te nōm  
hām'āktux'ax 'āpak.”

Kaxīy.

19 Hak yīkopit, hu: “Ok Yoneo yōg tikmū'ūn te hām 'ūm yūmmūg hok?” kaxīy. Yā' yūmmūg. Pa hōmā mōnāyxop hittap Mōyyex te Topa yōg hām'āktux kax'āmi', tu:

“Āte 'āyīpkumīygāp-tup, 'ūpuknōg xop hā  
 'āyīpkumīygāp-tup,  
 'ūpuknōg xop yā' hep puxet 'ohnāg, pāyā 'āte  
 'āyīpkumīygā-tup,  
 īhā puknōg xop yāyhā yōgnū tikmū'ūn.  
 Āte 'āgāyāp-tup nōm puknōg xop hah,  
 nōm puknōg xop pa te hāmyūmmūg 'ohnāg hā  
 'āte 'āgāyāp-tup,” kaxīy.

<sup>20</sup> Ha mōnāyxop hittap 'Iyait kuxānōg 'ohnāg, tu  
 Topa pupi hām'āktux tikmū'ūn pu', tu:  
 “Nōm xop tek 'ūm xak hok, pak xipihī,” kaxīy.

<sup>21</sup> Tu Yoneo xop 'āktux, hu:

“Āte tikmū'ūn xānāhā', mō'yāy xe'ēgnāg tu',  
 pāyā' yīpkox 'ohnāg, xix hām'āpak 'ohnāg,” kaxīy.

## 11

### *Topa te 'Iyaet yōg tikmū'ūn kuxa ka'*

<sup>1</sup> Āte xe' yīkopit, hu: 'Ok Topa tep-tup hok yāy  
 yōg tikmū'ūn? 'Ūp-tup! 'Ūgmūn kama nōm Yoneo  
 tikmū'ūn yōg. 'Ūgmūn 'Iyaet yōg tihik, yāk mūn  
 mōnāyxop 'Amanām mōkputox, xix Meyamīy yōg  
 xop kopak xip.

<sup>2</sup> Topa te Yoneo tikmū'ūn putup hok'ah, tu nōm  
 yīmōgatux tap. Hōmā mōnāyxop hittap 'Enit te  
 'Iyaet yōg tikmū'ūn 'āktux kummuk Topa pu',

<sup>3</sup> tu: “Topah, tikmū'ūn te 'ōg tik xop kix, nōm xop  
 te 'āmūn pupi hām'āktux, ha 'ōg mīmpe koxyōy, tu  
 mīmpe hāpxop mō'hap'ax Topa pu' koxyōy, hak mūn  
 puxehnāg xip, hak putex putup kama nōmhā,”  
 kaxīy.

4 Ha Topa te' yānān tu hām'āktux, hu: “Āte tik max xop xohix te 700 yīmōgatux, ha topa komut Mat pu nūktettex 'ohnāg,” kaxīy.

5 Yā hōnhā kaxīy kamah. Topa te tikmū'ūn kutōgnāg xop yīmōgatux, tu nōm xop ha hāmmaxnāhā', tu' kuxa ka',

6 tu' yīmōgatux 'ūkuxa ka tu'. Pax pu Topa hāpxopmā max hā' yīmōgātux, puxix tu tikmū'ūn kuxa ka hitop tu', pāyā Topa te' hok hā hāmmaxnāhā'.

7 Yīy Yoneo xop te' xak, puyīy 'ūxat'ax hā' kuxa tupmā Topa pu', pāyā' hitop tu' xak. Ha tikmū'ūn kutōgnag Topa te yīmōgatux, nūy 'ūkuxa tupmā yāymūn pu', ha Yoneo nōy xop xexka te Topa pu' yīpkox 'ohnāg.

8 Topa yōg tappet te: “Topa te nōm xop putox ka'ogāhā', yā hōnhā hāmyūmmūg 'ohnāg,” kaxīy.

9 Ha Mōnāyxop Namix te:  
“Pūyā Topa 'ūyōg hāpxopmā'ax kummuk hā' pago. Pūyā yāy yōg kummūk'ax hā' kummuk xop mūg ka'ok.

10 Pūyā' pēnā hok, xix hāpxop xak'ax tu' hittupmā hok,” kaxīy.

11 Āte xe' yīkopit. Yoneo yōg tikmū'ūn te Kunnix putup nōg, yīy Topa te nōm pu hāpkummugāhā'. 'Ok Topa tep-tup hok? Yāp-tup! Pāyā Topa te' hip, pu tu' puknōg xop yīpkox pi', puyīy Yoneo yōg tikmū'ūn yīpkumīy puknōg xop hā, nūy tu' yīpkox pi kamah Topa pu'.

12 Yoneo yōg tikmū'ūn te hāpxopmā kummuk, yīy Topa te' hep xop xohix ha hāmmaxnāhā', tu hāmmaxnāp-tup xexka', 'ihā Yoneo yōg tikmū'ūn kama' yīpkox pip, 'ihā Yoneo yōg tikmū'ūn



punethok yīpkox pip hām'āpak max ta tu'. Yā Topa te' xohix te xīy mō'kupix, pu yīpkox pi'.

*Topa te Yoneo xop hā' puknōg xop kuxa kummuk xit'ax*

<sup>13</sup> 'Āte' puknōg xop pu hām'āktux nōmhā. Topa te mōgkutnāhā' puknōg xop hah, pu hām'āpak max'ax 'āktux, hak kuxa hittup.

<sup>14</sup> Pūyā Yoneo yōg tikmū'ūn 'ūpuknōg xop pēnā', nūy kuxa mām ka'ok yūmmūg, hu' yīpkumīy, yā 'āte' xak, pu' yīpkumīy, pu Topa 'ūkuxa kummuk xit, nūy kuxa max yānān tu mō'tat.

<sup>15</sup> 'Ūpuknōg xop yāyhā Topa hā' xape', 'īhā Topa te Yoneo xop putup nōg, tu Yoneo yōg tikmū'ūn xohix putup 'ūxeheh, puxix Topa' xakix xop putpu' hīnnā'.

<sup>16</sup> Tikmū'ūn te pām koxip, nūy Topa pu 'ōm yāg hōm, puxix pām xohix Topa yōg. Tikmū'ūn te yīpxatit hōm Topa pu', puxix mīm xexka kup kama Topa yōg, xix mīmmāg kamah. Yā mōnāyxop hittap te mīm yīpxatit putuk, ha mīmmāg te hōnhā yōg Yoneo xop putuk.

<sup>17</sup> Mīm xexka kup 'Onimet, tu hāmpak'ax xuka' yūm, ha' mīmmāg 'um xak, ha 'Onimet kup puknōg tu mīmmāg xut, 'ūkup te hāmhipak tu' yūm ha' xut, ha' mīmmāg xut, nūy kup nōy putox tu' hīy, pu tu tox, mīmmāg nōy putuk. 'Āxop puknōg xop te 'Onimet puknōg putuk, Topa te xa hāmaxnāhā', tu xa hāmaxnāhā Yoneo xop putuk.

<sup>18</sup> Yīy Yoneo xop yāk-tōgnāg pe'āpaxeh hok: 'A 'āxop te yīpxatit putuk'ah. 'Āmhok. Pāyā 'āxop te mīmmāg putuk, yā mīmmāg te' yīpxatit tu' tup.

19 Pa 'āxop te: “Tikmũ'ũn te mĩmmāg xe'e' xut, nũy nŏ puknŏg hĩy 'ũp-tox tu', pu tu tox. Ha kaxĩy Topa te yāy yŏg Yoneo xop mŏy, nũy 'ũgmũg nŏy hā' yānān, puk mũg yā yāy yŏg tikmũ'ũn, mŏ 'ũgmũg yāy xe'ēgnāg tu',” kaxĩy.

20 Hamũn. Hāpxip kutŏgnāg 'ĩhā Topa tep-tup nŏg, 'ũkuxa mām 'ohnāg hah, ha 'ākuxa mām ka'ok, yĩy Topa te 'āp-tup pax, pa yāy pe'āpaxeh xexka hok. 'Ākuxānŏg, ka 'ākuxa mām kux.

21 Hŏnhā Topa te yāy yŏg Yoneo xop putup nŏg. 'Ākuxa te Topa nĩm, puxix Topa kamah 'āp-tup nŏg.

22 Topa te hāmyok mĩy, tu tikmũ'ũn kuxa ka kamah. Tu hāmyok mĩy 'ĩhā tikmũ'ũn kummuk xũygāhā', tu' yānān tu' kummugāhā', tu 'ākuxa ka', 'āyĩpkox pip hah. 'Āyĩpkox hok, puxix Topa 'āmŏy kamah.

23 Yoneo yŏg tikmũ'ũn te yāy putat kummuk nĩm, nũy kuxa mām ka'ok Kunnix kopah, puxix Topa' putpu' kuxa mām mā', yāy yŏg xip'ax tu'. Ha tikmũ'ũn te mĩmmāg xe'e hĩy putpu', puyĩy xip ka'ok. Kaxĩy Topa te Yoneo xop mām mā'ax 'ũxeheh.

24 'Āxop puknŏg, tu 'Onimet mĩmmāg putuk. Tikmũ'ũn te mĩmmāg xut, nũy kup xe'e tu' hĩy, pu tu' kup xe'e hā' mĩmmāg. Yoneo yŏg tikmũ'ũn te 'Onimet kup xe'e putuk, ha Topa te yā yāg putup nŏg, tu' xep-tup'ax kamah, puyĩy yāy mũn hā tikmũ'ũn xe'e 'ũxeheh.

### *Yā Topa mũn max xe'ēgnāg*

25 'Ūkxape xop, 'ũg'āpax: Hŏnhā Yoneo yŏg tikmũ'ũn yĩpkox 'ohnāg, pa hāptup nŏy xohix 'ĩhā' yĩpkox pip putup, 'ĩhā' puknŏg xop xohix punethok te Topa yŏg putat hā' mŏg, ha Topa te' xohix te

xīy mō'kupix, pu mōg. 'Āte xa hām'āktux'ax 'āktux, xayīy yāy yōg hāmyūmmūg pe'āpaxeh hok. Ha Topa te hām'āktux xe'e, nūy yāy yōg tikmū'ūn pu hāmyūmmūgā'.

<sup>26</sup> Tu Yoneo yōg tikmū'ūn xohix mōy putup, hāpkummugā'ax tu' mōy putup, yīy Topa yōg tappet te:

“Tik te yīktix Xiām tu' xip,  
tu' nūn putup, nūy tikmū'ūn kuxa kummuk xit,  
nūy Mōnāyxop Yako mōkputox  
kuxa kummuk xit.

<sup>27</sup> 'Āte hāmpa'ax mīy putup tikmū'ūn mūtik,  
'īhā 'āte' kuxa kummuk xit,  
tu' kuxa max yānān tu' tat,” kaxīy.

<sup>28</sup> Yoneo xop te Topa hā' puknōg, hām'āpak maxp-tup nōg tu', ha kaxīy 'āxop yā Yoneo xop'ah, nūy Topa hā 'āxape', pa Topa te Yoneo xop yīmōgatux tap, mōnāyxop hittap ha' yīmōgatux, tu hām'āktux xex, hu: “Āte 'āmōkputox hāk xape mōg kumak mōg, tuk kux 'ohnāg,” kaxīy.

<sup>29</sup> Topa te Yoneo yōg tikmū'ūn yīmōgatux, tu mō'yāy xe'ēgnāg, ha' hupmā 'ohnāg, yā Topa te' kuxyā 'ohnāg, tu nōm hā hāmaxnāp-tup.

<sup>30</sup> Hōmā 'āxop puknōg, 'ap Yoneo xop'ah, 'āyīpkox 'ohnāg Topa pu', ha Topa te 'ākuxa ka', Yoneo xop yīpkox 'ohnāg ha 'ākuxa ka'.

<sup>31</sup> Yā Topa te 'ākuxa ka', ha Yoneo xop yīpkox 'ohnāg nōmhā, pu Topa kama nōm xop kuxa ka'.

<sup>32</sup> Yā' hep xop xohix yīpkox 'ohnāg Topa pu', yīy Topa te' hīy, yāy yōg hāpxopmā'ax ha' hīy, ha Topa te' xohix kuxa ka', pu' xohix tu' mūg.

*Pūyā Topa max xe'ēgnāg 'āktux*

33 Topa te yā xohix ha hāmmaxnā xe'ēgnāg, pexkox yōg hāpxop xexka xe'ēgnāg hā, ha hāmyūmmūg xe'ēgnāg. 'A tikmū'ūn te Topa yōg hāpxopmā'ax xohix yūmmūg'ah, nūy tu nōy pu' yūmmūgā'. Āmhok.

34 Yīy Topa yōg tappet te:  
 “Tikmū'ūn 'ūm te Topa yōg hāmpē'paxex  
 yūmmūg'ah,  
 tu Topa pu hāmyūmmūgā 'ohnāg,  
 35 tu Topa pu hāpxop hōm 'ohnāg kamah, pu tu ta  
 nemēn,  
 nūy yānān tu' pago. 'Āmhok.” Kaxīy.

36 Yā Topa-xet te hāpxop xohix mīy, tu hāpxop xohix hinnāhā', tu yāymūn pu' mīy, xix yāy pu hīnnāhā'. Yā Topa mūn xexka xe'ēgnāg. Pūyā tikmū'ūn te nōm xexka 'āktux mō kuma' mōg! Hamūn!

## 12

### *Āpu yūmū'āte Topa tu hāpxopmā'*

1 Yīy 'āte xak xape xop xapit, xayīy Topap-xehnāg pu yāymūn hōm, tikmū'ūn te hāpxop hok hōm putuk. Yā 'āxop te ta nemēn, Topa te 'ākuxa ka hah, xayīy nōm puxehnāg pu 'āyīpkox pi'. Yā Topa tep-tup pax. Hamūn. Yā kaxīy 'āxop te Topa pu nū'āktettex xe'e'.

2 Hām xexka tu' pip tikmū'ūn yā Topa hā' puknōg, yīy nōm pu 'īpkox hok, nūy yōg hāpxopmā'ax tat hok. Pa Topa te 'āp-tox maxnā'ax, xayīy Topa yōg putup'ax yūmmūg, nūy hāpxopmā max. Topa te nōm putup, yīy 'ā māynāg mīy Topa tu'.

<sup>3</sup> Topa tek mūn ha hāmmaxnāhā', tuk ka'ogāhā', yīy xa hām'āktux, hu: 'Āmpe'āpaxeh max, nūy yāy yōg hāpxopmā'ax kopit max. Topa te 'ākuxa māmā ka'ok, xayīy 'āxop xohix hāpxopmā max, Topa te yā 'āxat hah.

<sup>4</sup> Tikmū'ūn yīn puxet, tu' kup punethok, xix hāpxop te yīn kopa' pip punethok, xi' mīy'ax punethok.

<sup>5</sup> Kaxīy yūmūg xohix punethok, pāyā yūmūg kuxap-xet Kunnix kuxa mūtik, yāk puxet, yā 'āyīn putuk.

<sup>6</sup> Topa te yūmūg xohix ka'ogāhā', tu' hok hā ka'ogāhā', nūy hāpxopmā', tu' hok hā yāy yūmūg ka'ogāhā'. Tu tikmū'ūn puxet ka'ogāhā', pu Topa pupi hām'āktux. Pūyā nōm tikmū'ūn hām'āktux, Topa te' kuxa māmā ka'ok hah.

<sup>7</sup> Xix tikmū'ūn nōy ka'ogāhā', pu' nōy hā tu tehet. Pūyā nōm tikmū'ūn hā tu' tehet. Xix tikmū'ūn nōy ka'ogāhā', pu hāmyūmmūgā'. Pūyā hāmyūmmūgā'.

<sup>8</sup> Xix tikmū'ūn nōy ka'ogāhā', pu tu' xape xop mō'nīynām, nūy ka'ogā'. Pūyā mō'nīynām. Xi' nōy ka'ogāhā', pu hāpxop hok popmā'. Pūyā' popmā', nūy tu' xupkumīy hok. Xi' nōy ka'ogāhā' pu tu' xat. Pūyā tu' xat max. Xi' nōy ka'ogāhā', pu tu' nōy kuxa ka', nūy tu hittupmā'. Pūyā tu hittup, 'ūnōy kuxa ka 'īhā'.

<sup>9</sup> 'Āxape hā mō'āmā hok, pa nōm putup pax xe'e'. Hāpkummuk'ax putup hok, nūy tu hāmma xax, nūy hāpxopmā max mō kuma' mōg.

<sup>10</sup> 'Āxop xohix Kunnix hā 'āxape', yīy 'āxop xohix hā yāy xape'. 'Āpu, yāy putup pax, nūy 'ānōy pe'āpaxeh xexkanā xip.

11 Hāpxopmā max, tu tuknōg hok, nūy Topa pu hāpxopmā, 'ākuxa hittup tu'.

12 'Ākuxa hittup 'ihā Yeyox Kunnix nūn'ax hā' hip, tu hāpxopmā ka'ok hā' tot, nūy hāmmax hip, xix Topa pu hām'āktux mō kuma mōg, yā' kux hok.

13 'Āxupkumīy hok, tu 'āxape hok xop pu hāpxop hōm, xi' puknōg xop xānā', pu 'āpet kopa' mōy mō'xip.

14 Topa tu' xax, pu hāmmaxnā tikmū'ūn kummuk hah, nūy nōm xop te 'ākummugā xop ha hāmmaxnā', ha Topa tu' xax hok, puyīy nōm pu hāpkummugā 'ūyānān tu'. 'Āmhok.

15 Tikmū'ūn potaha', 'āpu nū yōkāmū poho kamah. Tikmū'ūn hittup, 'āpu nū mūtik 'āhittup kamah.

16 'Ānōy mūtik 'āti max, ha yāy tukmīy hok. Yāy pe'āpaxeh xexka hok, pa' nōy te 'āxat'ax pu 'āyīpkox pi', nūy nōm pu 'āhām max. Yāy pe 'āpaxeh hok, hu: Yā puxehnāg 'āte hāmyūmmūg. Kaxīy.

17 Tikmū'ūn te xa hāpkummugā', 'āpu, 'āyānān tu hāpkummugā hok. 'Āpu, hāpxopmā max, puyī' xohix yūmmūg, tu: "Hāpxopmā max 'ōhōm," kaxīy, nūy xa hām'āktux max.

18 'Ūxax, nūy tikmū'ūn xohix mūtik yāykix ta tu yāytuk-mīy 'ohnāg, nūy 'āxohix kuxa māmā'.

19 Tikmū'ūn te xa hāpkummugā', 'āpu 'ūyānān tu' kummugā hok. 'Āmhok. Pūyā Topa' kummugā', ha Topa yōg tappet te Topa yōg hām'āktux 'āktux, tu: "Ūgmūn yā Topah, tu hāpkummugāp-tup 'ūyānān tu', nūy tu pago," kaxīy.

20 Ha Topa yōg tappet te xa hāmyūmmūgāhā', hu: "Tikmū'ūn te xa tu' gāy, tup-tup xūy, 'āpu, tu' hōm

hãpxop, puyĩ' mã'. 'Ûgãy xop te kõnãg tat xak, 'ãpu, kõnãg tat, nõy hõm, puyĩ' xo'op. Kaxĩy xate' gãy xop kuxyãhã', pu yãyhãhup xexka', yã' payĩn pukpex," kaxĩy.

<sup>21</sup> Tux hok, xa hãpkummuk mĩy hok, pa hãpxopmã max, xayĩy hãmmax mĩy.

## 13

### *Gohet yõg tik xop pu 'ãyĩpkox pi'*

<sup>1</sup> Pũyã' xohix gohet pu yĩpkox pi', nõy tik xop te tikmũ'un xat'ax pu yĩpkox pi'. Yã Topa te' tux hok pu tu tikmũ'ũn xat.

<sup>2</sup> Tikmũ'ũn te gohet xop pu' yĩpkox hok, puxix Topa pu' yĩpkox hok kamah, ha Topa te nõm tikmũ'ũn yõg hãpxopmã'ax kummuk kopit, tu' xũygãp-tup, pu tu pago.

<sup>3</sup> Tikmũ'ũn te hãpxopmã max, puxix gohet yĩpkutuk hok, ha tikmũ'ũn te hãpxopmã kummuk, puxi' yĩpkutuk. Xatep-tup nõy 'ãkuxãnõg hok, 'ãpu hãpxopmã max, puyĩy tik te 'ãxat'ax 'ãmax 'ãktux.

<sup>4</sup> 'Õhõm te Topa pu' hãm, nõy xa hãmmaxnã'. Xate hãpkummuk mĩy, 'ãpu 'ãxat'ax yĩpkutuk, tute 'ãxũygã'ax, xa tu pago. Topa te' xat'ax xop xat, pu' yãnãn tu tikmũ'ũn kummuk pu hãpkummugã'.

<sup>5</sup> Yĩy 'ãxat'ax xop pu 'ãyĩpkox pi', Topa te 'ãxat hah, 'ãkuxa te 'ãxat hãmãxap, ha 'ãxũygã hok kamah.

<sup>6</sup> 'Õg tayũmak hã pago kama gohet pu', gohet te nõm tayũmak xak hah. Yã' xat'ax xop te Topa pu hãpxopmãhã', ĩhã 'ãxat.

<sup>7</sup> Hu pago tayũmak hã xate ta nemen, xix' xat'ax xop pe'ãpaxex xexka kama xate ta nemën.

*Ãnõy ha hãmmaxnã'*

8 Tikmũ'ũn pu ta nemēn hok, pap-tup pax xexka'. Tikmũ'ũn te Topa yōg xat'ax mǎynǎg mǎy, 'ĩhǎ' nōy putup pax.

9 'Ūxat'ax te: "Ānōy hǎ xupxet hok," kaxīy, xix: "Ūp-tex hok," kaxīy, xix: "Hǎpxop hǎ xupxet hok," kaxīy, xix: "Ānōy yīpkumīy hok," kaxīy. Yǎ' xat'ax xohix te yūmũ'ǎ hǎmyūmmūgǎhǎ', ha hǎmyūmmūg'ax puxet, hu: 'Ānōy putup pax, yǎ yǎy mūn putup pax putuk. Kaxīy.

10 Tikmũ'ũn te' nōy putup pax, puxi' nōy pu hǎpkummugǎ 'ohnǎg, yīy tikmũ'ũn te' xat'ax pu' yīpkox pīp, 'ĩhǎ' nōy putup pax xe'e'.

11 Āpu, 'ānōy putup pax. Yǎ hǎptup xe'e mō'nǎ'ax, puxix Kunnix nū', nūy yǎy yōg tikmũ'ũn yǎy tu nū'xok, 'ākuxa tuknōg hok, nūy tikmũ'ũn mō'yōn putuk hok. Yǎ hōmǎ yūmūg kuxa mām ka'ok Yeyox kopah,

12 pa yǎ hǎptūmnǎg, ha hǎptup te hǎpkanet hǎ mō'nǎ'ax, ha kaxīy yūmūg xuxyǎ xupep putup. 'Āpu, yūmũ'āte hǎpkummuk mǎy kux, nūy 'āmñīy koxtap kopa yōg hǎpxopmǎ'ax kuxyǎ', nūy hǎpkummuk mūtik yǎy tuk-mīy mǎyōn xupep 'ĩhǎ'.

13 Yīy hǎmyok mǎy nōmhǎ, yǎy xaptop hok. Hǎpkute'ex kummuk hok, xix kenmuk xo'op hok, nūy 'āpaptux hok, xix 'ūpēnǎ pax hok, xayīy hǎpkummuk mǎy hok, xix 'ānōy hǎ xupxet hok, xix hǎmpe'āpaxeh kummuk hok, xix yǎykix hok, xix 'āyīpkumīy hok.

14 Yǎ yūmūg xuxyǎ Yeyox Kunnix te 'āpupi' xip, nūy 'āxeh, yī' tux hok pu xeh, ha yǎy pu 'īpkox pīp hok, nūy yǎy yōg putup'ax mǎy hok, ka hǎpkummuk mǎy.



## 14

*Ānōy yōg hāpxopmā'ax kopit hok*

<sup>1</sup> Āxop kopa' pip tikmū'ūn kuxa mām pu'uk, 'āpu nōm putup pax, pa hām'āktux hā' nōy yānān hok, 'ūyōg hāmpē'paxex hā yāy tuk-mīy hok.

<sup>2</sup> Tikmū'ūn kuxa yūm ka'ok, puxi' xit'ax xohix māhā', pa tikmū'ūn kuxa yūm pu'uk te xogyīn mā 'ohnāg.

<sup>3</sup> Tikmū'ūn yāg te hāpxop xohix māhā'. Pūyā' nōy mūn putup, nōm te xogyīn ma hok, nūy nōm pe'paxeh kutōgnāg hok. Tikmū'ūn yāg te xogyīn mā 'ohnāg. Puyā' nōy putup, nōm te hāpxop xohix māhā', pu nōm pe'paxex kutōgnāg hok. Topa te nōm putup pax, yā' puxi'.

<sup>4</sup> 'Ok yāy pe'āpaxex xexka', nūy 'ānōy yōg kāmānat yōg hāpxopmā'ax kopit? Yūmūg xuxyā te' kopit putup, nūy hāmyūmmūg, 'ok pe kāmānat hām max, pe' hām kummuk. Yā' hām maxp-tup. Topa te' ka'ogā'ax, puyīy hāpxopmā max.

<sup>5</sup> Tikmū'ūn yāg te hāptup tuknōg putup, 'īhā' nōy te 'āmnīy xohip-tup, ha 'āmnīy xohix te yāy putuk hamūn pu'. Pūyā tikmū'ūn kuxa xohix mām ka'ok, nūy hāmyūmmūg, nūy yāy yōg hāpxopmā'ax yūmmūg, 'ok pe' max, 'ok pe' kummuk.

<sup>6</sup> Tikmū'ūn te hāptup tuknōg putup, puxix mōy Topa xexka 'āktux, 'īhā nōm hāptup putup, ha tikmū'ūn te hāpxop xohix mā', puxix Topa xexka 'āktux, 'īhā hāpxopmāhā', hu: “Āmax Topah, tu hāpxop xohix 'ā' hōm, nūy 'ūkxīnnā',” kaxīy. Ha tikmū'ūn te xogyīn mā hok, puxix tu Topa xexka 'āktux 'īhā' mā hok, tu: 'Āmax Topah, xa hām yōg hāpxop punethok 'ā' hōm, nūy 'ūkxīnnā',” kaxīy.

7 Tikmũ'ũn puxehnãg hã 'ap hi'ah, tup-xehnãg hã 'ap xok'ah, pãyã Topa te yũmũg xat, 'ok pe yũmũg hi', pe yũmũg xakix.

8 Yũmũg hi, koxix Topa tu yũmũg hi'. Yũmũg xakix, koxix Topa tu yũmũg xakix. Yã kaxĩy, pe yũmũg hi', pe yũmũg xakix, koxix Topa yõg yũmũ'ã'.

9 Kunnix xok, tu putpu' hi', nũy tu yãyhã nõm hi xop yãy xuxyã', xi' xakix xop yãy xuxyã kamah.

10 Xix 'ãmũn, tep tu xate 'ãxape yõg hãpxopmã'ax kopit, nũy hãpxopmã'ax 'ãktux kummuk? 'Ãnõy 'ãktux kummuk hok. Yũmũg xohix te Topa keppak pip putup, pu yũmũg yõg hãpxopmã'ax xohix kopit, nũy hãmyũmmũg, 'ok pe yũmũ'ãte hãpxopmã max, pe hãpxopmã kummuk.

11 Yĩy Topa yõg tappet te Topa yõg hãm'ãktux 'ãktux. Ha Topa te:

“Ãte xa hãpxe'e 'ãktux, tu xa hãm'ãktux xex:

Yãk hi mõkumak mõg,

yĩy 'ũhep xohix xop tek keppa nũktettex putup, nũy tu kuxa' yẽy,

tutek mũn ha Topa xe'ẽgnãg 'ãktux putup,” kaxĩy.

12 Yĩy yũmũg xohix te Topa keppak pip putup, nũy yãy yõg hãpxopmã'ax 'ãktux.

### *'Ãnõy kummugã hok*

13 'Ãxape kummuk 'ãktux hok. 'Ãmhok, hãpxopmã hok, nũy 'ãnõy pu hãpkummugã hok, puyĩy hãpkummuk mĩy hok.

14 'Ûgkuxap-xet yũmũg xuxyã kuxa mũtik, hu 'ãte hãmyũmmũg, ha hãpxop xit'ax xohix max, 'ũyĩ' mã', pa tikmũ'ũn yãg te: “Nõm te xokxop mã hok xop.

Yā' kummuk tikmũ'ũn te' mā'," kaxīy, puxix nōm xit'ax yā nōm tikmũ'ũn hā 'ũmā hok.

15 Xate nōm hāpxop mā', hu ta 'āxape kuxa hit-tupmā hok, tu' kummugāhā', hu nōm putup nōg. 'Āxit'ax hā 'āxape pu hāpkummugā hok, ka tute Topa yōg putat xak. 'Ok yūmmũg xate'? Yā Kunnix te 'āxape pupi' xok, nūy nō hāmmāxnā', pa xate' kummugāhā 'āxit'ax hā. 'Āpu 'ānōy kuxa putex hok!

16 Xate hāpxopmāhā', tu hāmpē'āpaxex, hu: "Yā 'āte hāpxopmā max," kaxīy. Yā' max, pa 'āxape mūtik hām'āktux hok, nūy nōy yānān hok. Yā 'āxape te hāmpē'paxex nōy. 'Āyīy hok, xayīy 'āxape gāyā hok, ka 'āxape 'ōg hāpxopmā'ax kopit kummuk.

17 Topa te yāy yōg tikmũ'ũn xat, tu tikmũ'ũn kuxa tu' xat, tu putep mūn mā'ax 'ap xat'ah, xix putep xo'op'ax 'ap xat'ah. 'Āmhok. Topa te tikmũ'ũn xat, pu max, tu' xat, pu tu kuxa yūm ka'ok, tu' xat, pu tu kuxa hittup xexka', ha Topa Koxuk te' kuxa hittupmā'ax, tu hāpxopmā'ax max hā' kuxa yūmmā'ax.

18 Ha tikmũ'ũn te Kunnix pu hāpxopmā kaxīy, puxix Topa nōm 'ūmax 'āktux, ha tikmũ'ũn xohix te nōm 'ūmax 'āktux kamah.

19 'Āpu yūmũ'āte hāxopmā maxnā', nūy kuxa yūmmā', nūy yūmũg xape ka'ogā'.

20 Pa nūy ta nōy kummugā hok. 'Āxit'ax hā 'ānōy kummugā hok. 'Āmhok. 'Ōg pa 'āti!' 'Ānōy yā Topa yōg, ha Topa te nōm putup pax, 'ūyōg hah, ha' kummugā hok, nūy 'āxit max.

21 Topa tep-tup tikmũ'ũn te xogyīn mā hok, xix ta hep xupyāg xo'op hok, ka' nōy hā hāpkummugāhā'.

22 Xate hāpxopmāhā', tu' max pe'āpaxex, 'ākuxa yūm ka'ok, hu 'āxit, xi' xo'op, ha xate' yūmmūg, xix Topa te' yūmmūg. Puxi'. Tikmū'ūn kuxa yūm ka'ok yāy yōg hāpxopmā'ax kopah, puxix tu kuxa hittup xexka', ha' kuxa te yāy mūn tu: Yā' max. 'Āte hāpxopmā max hōnhā," kaxīy.

23 Pa tikmū'ūn kuxa yūm pu'uk, tu yāy mūn yīkopit, 'ok pe' max, 'ok pe' kummuk, 'ū hāpxop 'ūm mā', puxix Topa' tux hok pu' mā hok, 'ūkuxa yūm 'ohnāg hah. Tikmū'ūn kuxa yūm pu'uk, 'ihā hāpxopmā', puxix hāpkummuk mīy, 'ūkuxa yūm pu'uk tu'.

## 15

### *Āpu, 'ānōy yōg putup'ax mīy*

1 Topa tek xat, 'ūyīy yūmūg xape xop mō'nīynām, nōm xop kuxa mām pu'uk mō'nīynām, nūy nō ka'ogā', nūy yūmūg yāy yōg putup'ax mīy hok.

2 'Ānōy yōg putup'ax mīy, nūy nōm ha hāmmaxnā', pu tu kuxa yūm ka'ok Yeyox kopah.

3 Kunnix te yāy yōg putup'ax mīy 'ohnāg, yīy Topa yōg tappet te Kunnix 'āktux, tu hām'āktux, hu: "Tikmū'ūn te 'ākummuk 'āktux, puxik mūn kummuk 'āktux kamah," kaxīy.

4 Hōmā tik xop hittap te Topa pupi hām'āktux, tu tappet tu kax'āmi', ha mō'yūmūg nīynām, 'ūyīy nōā'tot, ha Topa yōg tappet te yūmūg ka'ogāhā', 'ū Kunnix putpu nūn'ax hip.

5 Topa te 'āka'ogāhā', xix xa hā' totnāhā'. Pūyā Topa 'āxop kuxa puxetnā', xix 'āp-tox puxetnā kamah, xayīy Yeyox Kunnix yōg hāpxopmā'ax tat,

<sup>6</sup> nŭy Topa yŭmŭg Tak max 'āktux, nŭy 'āyŷy'ax puxet hā Topa max 'āktux, yā 'ōhōm yŭmŭg xuxyā Yeyox Kunnix hā 'Ātak.

*Yā hām'āpak max 'āktux Yoneo xop hā' puknōg xop pu'*

<sup>7</sup> Āpu, 'āxape putup, yā kaxīy Kunnix te 'āp-tup, tu mō'āyāy xe'ēgnāg. 'Āxape putup pax, pu tikmū'ūn te: “Topa mŭn max xe'ēgnāg!” kaxīy.

<sup>8</sup> Āte xa hāpxe'e 'āktux: Kunnix te Yoneo xop tu hāpxopmāhā', tu nōm xop ha hāmmaxnāhā', pu nōm xop yŭmmŭg, tu Topa te hāmyok mīy yŭmmŭg. Yā Topa te' yōg hām'āktux xex, tu mōnāyxop hittap pu' xex, tu' xaxok 'ohnāg, tu māynāg mīy.

<sup>9</sup> Ha Kunnix te hāxopmāhā', pu' puknōg xop yŭmmŭg kamah, yā Topa te puknōg xop kuxa ka', puyīy Topa max 'āktux, yīy Topa yōg tappet te: “Yā 'āmax Topah, yīy 'āte' puknōg xop pu hām'āktux putup,

tuk-tex putup, nŭy 'āmax 'āktux,” kaxīy.

<sup>10</sup> Tu xe hām'āktux, hu:

“Pŷyā' puknōg xop kuxa hittup Yoneo xop mŭtik. Yā Topa te Yoneo yōg tikmū'ūn yīmōgatux,” kaxīy.

<sup>11</sup> Tu xe:

“Pŷyā' puknōg xop xohix Topa xexka 'āktux, pŷyā' hep xop xohix Topa pu hām'āktux punethok, nŭy tu: “Āmax xe'ēgnāg,' kaxīy, Topa pu',” kaxīy.

<sup>12</sup> Ha mōnāyxop hittap 'Iyait te Topa yōg tappet tu kax'āmi', hu:

“Yexe mōkputox 'ŭm nŭn putup, nŭy puknōg xop xat,

ha' hittup, tu' hip, pu mōkputox nŷ',” kaxīy.

13 Yā Topa te yūmūg kuxa hittupmāhā', pūyā 'ākuxa māmā, xayī' hip, Yā yūmū'ā' hōm putup pekkox yōg hāpxop xohix, ha yūmū'āte' hip, nūy pop. Yā Topa Koxuk te 'āka'ogāhā', xa hāmmax hip kamah, nūy pekkox yōg hāpxop tu pop.

*Paot te hāpxe'e 'aktux*

14 'Ūkxape xop, 'ūgkuxa yūm ka'ok 'ākopah, yā 'ākuxa max, tu hāmyūmmūg, ha 'āte 'āyūmmūg, ha hāmyūmmūg max, nūy 'ānōy pu hāmyūmmūgā'.

15 Pa 'āte xa kax'āmi tappet, tu xa hāpxe'e 'aktux, tuk kuxānōg 'ohnāg, nūy xa xaxogā hok. Yā Topa tek yāyikutnāhā', 'ū hāpxopmā nōm pupi', tuk hittup xexka'.

16 Yā hāpxopmāhā Yeyox Kunnix tu', nūy hāmpuknōg yōg xop mō'nīynām, tu Topa yōg hām'āpak max'ax 'aktux, 'āmānex putuk tu', puyī' puknōg xop kuxa mām ka'ok Topa kopah. Yā mō'yāy xe'ēgnāg, ha Topa Koxuk te nōm xop yīmōgatux, nūy Topa kuxa hittupmā'.

17 'Ūghittup xexka', Topa tu 'āte hāpxopmāhā', tuk kuxa hittup. Yāk kuxap-xet Kunnix kuxa mūtik.

18 'Ap 'ūgkuxānōg'ah, tu hām'aktux xe'e', nūy Kunnix te hāpxopmā'ax 'aktux, 'a 'āte hām'aktux nōy 'aktux 'ūm putup'ah, pa Kunnix 'ūgmūg 'ūm hā hāpxopmā ka'ok, puyī' puknōg xop kuxa mām ka'ok Topa kopah, 'āte hām'aktux, nūy hāmyūmmūgā', puyī' puknōg xop yīpkox pi Topa pu'.

19 Topa Koxuk te mōgkutnāhā', tuk ka'ogāhā', 'āte hāpxopmā xe'ēgnāg, puyī' puknōg xop pēnā', hak ka'ogāhā', 'ū hāpxopmā ka'ok xe'ēgnāg. Yā kaxīy tikmū'ūn 'ūm te' mīy hok, yīk xip Yenoyanēn tu',

tuk mōg, tuk xupep hāpxexka 'Init tu', nūy hām'āpak max'ax xohix 'āktux, nūy Kunnix 'āktux.

20 'Āte hāpxopmā punethok, nūy hām'āpak max'ax 'āktux, nūy Kunnix 'āktux puknōg xop pu', nōm xop te Kunnix 'āxet'ax 'āpak hok pu' xuktux, nūy nōy yōg hāpxopmā'ax mīy hok. 'Āte putup'ah, 'ūnōy te hāpxopmā hāmāxap, 'ūg-nāy tu hāpxopmā'.

21 Ha Topa yōg tappet te:

“Tikmū'ūn 'ūm te nōm 'āktux 'ohnāg, pāyā' puknōg te' pēnāp-tup, ha hām'āpak 'ohnāg xop te hāmyūmmūg putup,” kaxīy.

*Paot te kōmēn xexka Hōm tu' mōg putup*

22 'Āmnīy xohix hā 'āte' xak, nūy 'āhak mōg, pāyāk mōg'ah.

23 'Āte hāpxopmā kux nūnte, kopxix 'āhak mōg. Yā 'āte' hip hāmyāxatamuk xohix hā, 'ūg 'āha mōg.

24 Huk mōg putup nōmhā. 'Ūgmōg putup hāpxexka 'Expān hah, tu 'āp-tup, xa mōgnīynām, 'ūyīy 'Expān tuk mōg, tu 'āxop mūtik 'ūkxip putup hāmāxap.

25 Hōnhāk mōg Yenoyanēn tu', nūy Topa yōg tikmū'ūn tu hāpxopmā'.

26 Yā hāpxexka Māxenōn yōg kuxa mām ka'ok xop, xix hāpxexka Genex yōg kuxa mām ka'ok xop te tayūmak pop, nūy Topa yōg tikmū'ūn pu' popmā Yenoyanēn tu', nūy hok xop pu' popmā'.

27 Nōm kuxa mām xop te' popmāp-tup, nūy hok xop pu' popmā'. Yā' max 'ū popmā', Yoneo xop pu' yānān tu' popmāhā'. Yā Yoneo xop te' puknōg xop ha hāmmaxnāhā', yī' puknōg xop te tu ta nemēn, nūy yānān tu' hok xop pu hāpxop popmā'.

28 'Āte hāpxopmā kux, kopxi' hok xop pu hāpxop popmōg, tu 'Expān hak mōg putup, tuk mōg putat hā, kopxix 'āhak mōg kamah.

29 'Ūgmōg, nūy 'āha hāmmaxnā', pu Kunnix 'āha hāmmaxnā xexka'.

30 'Ūkxape xop, 'āte 'āxapit, yūmūg xuxyā te mō yūmūg yāy xe'ēgnāg hah, xix Topa Koxuk te mōgyāy hah, xa mōgnīynām, nūy Topa puk 'āktux nām, puk mūn ka'ogā',

31 tuk pēnā max, tuk mōgnīy, puyīy Yoneo yōg kuxa mām hok xop tek kummugā hok. 'Āpu, Topa tu' xax kamah, puyīy Yenoyanēn yōg kuxa mām ka'ok xop 'ūgputup, 'āte hāpxopmā max hah.

32 Topa tek putup, kopxik mōg 'ūm 'āhah, tuk hittup xexka', nūy 'āmūtik 'ūktihi', nūy 'āmūtik 'ūghittup.

33 Pūyā Topa 'ākuxa māmā', xix 'āmūtik tihi'. Hamūn!

## 16

### *Paot te' xape xop pu 'āneo*

1 Pep yā yūmūg xape hex, tu' max, tu kōmēn Xēnkenex yōg kuxa mām ka'ok xop pu hāpxopmāhā', tu' hok xop pu hāpxop popmāhā',

2 yīy nōm putup, nūy nō tu 'ātehet, yā yūmūg xuxyā 'ūyōg kamah. Pūyā' xohix hā tu' tehet, yā tikmū'ūn punethok hā' xape, xik mūn hā' xape'.

3 'Āte Pinixit xix 'Ak pu 'āneo hōm, yāk mūn mūtik Topa tu hāpxopmāhā', tu yāk mūn hā 'ūkxape xe'e'.

4 Tu 'ā' xok'ax, yīy 'āte nōm pu: 'Āmax xe'e', kaxīy. 'Āte' puknōg xop yōg kuxa mām ka'ok xop xohix mūtik hām'āktux, hu: 'Āmax xe'e! Kaxīy.



<sup>5</sup> 'Āte' kuxa mām ka'ok xop pu 'āneo hōm kamah, nōm xop te 'Ak pet tu yāy tu nū'nāhā'.

'Āte 'Ēpēn pu 'āneo hōm kamah, hak mūn hā 'ūkxape', tu 'Ax yōg tik te māxap, nūy kuxa yūm Yeyox kopah.

<sup>6</sup> 'Āte Mānix pu 'āneo hōm, ha 'āxop pu hāpxopmāhā punethok.

<sup>7</sup> Xix 'Ānenōn xix Yōn pu 'āneo hōm, ha kama Yoneo yōg tihik, 'ūgmūn putuk, tuk mūn mūtik pip kanet kopah. Yeyox yōg mō'pok xop te' yūmmūg max, ha' kuxa mām ka'ok hāmāxap, hak-nāy tuk kuxa yūm ka'ok kamah.

<sup>8</sup> 'Āte 'Āpit pu 'āneo hōm, hak mūn hā yā 'ūkxape' xe'e, yāg mūg kuxap-xet yūmūg xuxyā kuxa mūtik.

<sup>9</sup> Xix 'Ohmān pu 'āneo hōm, hak mū mūtik hāpxopmāhā', tu Kunnix tu hāxopmāhā', xix 'Extak pu 'āneo hōm, hak mūn hā 'ūkxape xe'e'.

<sup>10</sup> Xix 'Apet pu 'āneo hōm, yā Kunnix tu hāpxopmā xexka', ha tikmū'ūn te' yūmmūg. Xix 'Anixtop pet kopa' pip xop pu 'āneo hōm.

<sup>11</sup> Xix 'Enoniām pu 'āneo hōm kamah, ha Yoneo yōg tik kamah, xix Nāxix pet kopa' pip xape xop pu 'āneo hōm kamah.

<sup>12</sup> Xix Tinipēn xix Tinipox pu 'āneo hōm, yā Topa tu hāpxopmāhā', xix Pex, hak mūn hā 'ūkxape', tu yūmūg xuxyā tu hāpxopmāhā xexka'.

<sup>13</sup> Xix Hop pu 'āneo hōm, yā hāpxopmāhā xexka Topa tu', xi' tut pu 'āneo, yāk mūn hā yā' tut.

<sup>14</sup> 'Āte 'Axīn pu 'āneo hōm, xix Penegōn pu' hōm, xix 'Ehēm pu' hōm, xix Pa'ot pu' hōm, xix 'Ehām pu' hōm, xix yūmūg xape xop te' pet kopa' pip pu 'āneo hōm.

15 Xix Pinot pu 'ãneo hõm, xix Yonit pu' hõm, xix Neneo pu' hõm, xi' hex pu' hõm, xix 'Onĩm pu' hõm, xix Topa yõg tikmũ'ũn xohix pu 'ãneo hõm, nõm te' mũtik pip xop pu 'ãneo hõm kamah.

16 Yãy kep ha yãy mũg, nõy tu 'ãneo. Yã Kunnix yõg tikmũ'ũn xohix te 'ãxop pu 'ãneo hõm.

*Paot te hãmyũmmũgãhã'*

17 'Ũkxape xop, 'ãte xa hãm'ãktux: 'Og pa mõxip! Tikmũ'ũn kummuk te xa hãm'ãktux hã' nõy yãnãn, puyĩy 'ãgãyã', puyĩy yãy xakot, ha Topa yõg hãm'ãktux yũmmũgã kummuk. 'Äpu, 'ũnĩm nõm kummuk xop.

18 Tikmũ'ũn te hãpxopmã kummuk ha xĩy, puxix Kunnix yũmũg xuxyã tu hãpxopmã 'ohnãg, pãyã hãpxop xak, nõy xit. Tu hãm'ãktux mãynãg, nõy yã tikmũ'ũn pu mõ'ãmã', nõy tikmũ'ũn hãmyũmmũg hok xop pu mõ'ãmã'.

19 Tikmũ'ũn xohix te 'ãyĩpkox pip'ax yũmmũg, ha hãm'ãpak max'ax pu 'ãyĩpkox pip, 'ãyĩy xa tuk hittup, tup-tup, xa hãmyũmmũg, nõy hãpxopmã max, pãyã 'a 'ãte putup'ah, xa hãpxopmã kummuk yũmmũg. 'Ämhok.

20 Topa te yũmũg kuxa mãmmãhã', tu hãpxip kutõgnãg ĩhã Hãmgãyãgnãg koxyõy putup, pu 'ãxop totnok nãm, tu' nõã'.

Pãyã yũmũg xuxyã Yeyox xa hãmaxnã'!

21 Tĩmõn tek mũtik hãpxopmãhã', tu xa 'ãneo hõm, xix Noxit, xix Yaxãm, xix Xoxit, te 'ãneo hõm kamah. Nũ tik xop xohix Yoneo xop, 'ũgmũn putuk.

<sup>22</sup> 'Ūgmūn Tex, tu Paot pupi tappet kax'āmi', tu 'āxop pu 'āneo hōm, yāk mūn Kunnix yōg, 'āxop putuk.

<sup>23</sup> Xix Gax te 'āneo, hak mūg pip Gax pet tu', ha' kuxa mām xop te nū pet tu ta tu yāy tu nū'nāhā', tu nū'āktettex. Xix 'Enax te 'āneo, ha kōmēn yōg tayūmak xex, xix Koat te 'āneo, ha yūmū'ā hā' xape'.

<sup>24</sup> Pūyā yūmūg xuxyā Yeyox Kunnix 'āxop xohix ha hāmmaxnā'! Hamūn!

*Paot te Topa xexka xe'ēgnāg 'āktux*

<sup>25</sup> 'Āpu yūmūg Topa xexka 'ūm 'āktux! Tu 'ākuxa mām mā'ax ka'ok, xayīy 'ākuxa mām ka'ok mō' kuma' mōg. Yā hām'āpak'ax te' xuktux, 'āte nōm te xa' xuktux, tu Yeyox Kunnix xa' xuktux. Hōmā Topa te hāpxaptop,

<sup>26</sup> pa hōnhā hāmyūmmūgāhā', tu tik xop hittap hā' yūmmūgāhā', nōm xop te Topa pupi hām'āktux, tu tappet tu kax'āmi', pu Topa yōg tikmū'ūn hāmyūmmūg, ha Topa hi xe'ēgnāg mō' kuma' mōg, tu' xat, pu' hep xop xohix pu' xuktux, pu hām xexka xohix yōg tikmū'ūn pu' xuktux, puyī' xohix yīpkox pi', xi' kuxa mām ka'ok hām'āpak max'ax kopah.

<sup>27</sup> Topap-xehnāg, 'ūnōy 'a' ti'ah, ha hāmyūmmūg xe'ēgnāg. Pūyā' xohix Topa xexka xe'ēgnāg 'āktux, Yeyox Kunnix ha hām'āktux.

Tu ta tu' kux.

**Topa Yōg Tappet**  
**New Testament in Maxakalí (BR:mbl:Maxakalí)**

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
a212b59e-62d7-5a38-9773-b0ce1d5b248b